



**LOKWALO LWA GA JONA**

**KE ENG SE SE KA RE KGAOGANYANG  
LE LORATO LWA MODIMO?**

**DITSHOLOFETSO TSA MODIMO**

**HONG KONG**

**BASADI**

**BA**

**MABAPTIST**



**LOKWALO LWA GA JONA**

**KE ENG SE SE KA RE KGAOGANYANG  
LE LORATO LWA MODIMO?**

**DITSHOLOFETSO TSA MODIMO**

**HONG KONG**

**BASADI**

**BA**

**MABAPTIST**

**DITHULAGANYO TSA BASADI BA MABAPTIST**

**LOKWALO LWA GA JONA**

**KE ENG SE SE KA RE KGAOGANYANG LE LORATO LWA MODIMO?**

**DITSHOLOFETSO TSA MODIMO**

**HONG KONG**

Copyright, 2006,  
International Publications Services  
All Rights Reserved  
w232-bot-tsw

Africa Coordinated Curriculum for Bible Study  
© International Publication Services all rights reserved  
Used by permission

Published by  
**Baptist Publications**  
P.O. Box 228  
Lobatse, Botswana

## DITHULAGANYO TSA BASADI BA MABAPTIST

### THULAGANYO

### TLHOGO

### TSEBE

#### Kabelo Ya Ntlha: LOKWALO LWA GA JONA

1	Jona--O Tsamaya Kgakala le Modimo.....	1
2	Jona--O Tsamaya le Modimo.....	4
3	Jona--O Tsamaya Kwa Pele Ga Modimo.....	6

#### Kabelo Ya Bobedi: KE ENG SE SE KA RE KGAOGANYANG LE LORATO LWA MODIMO ?

4	Go Lebagana Le Loso Kwa-Ntle Ga Poifo.....	9
5	Maswabi Mo Lolwapeng Ka Ntlha Ya Go Se Tsale Bala Gongwe Go Tsala Bana Ba Mofuta O Le Mongwe-fela.....	11
6	Go-Tlhomama Mo Tumelong Ka Diteko.....	13
7	Go-Lebagana Le Maswabi Ka Tumelo.....	15

#### Kabelo Ya Boraro: DITSHOLOFETSO TSA MODIMO

8	Ditsholofetso Tsa Botshelo Jo Bo Sa Khutleng.....	17
9	Ditsholofetso Kaga Thapelo.....	19
10	Ditsholofetso Tse Di Amang Kutlo-Botlhoko le Thaelo.....	21
11	Ditsholofetso Tse Di Amang Botlhale le Nonofu.....	24

#### Kabelo Ya Bone: HONG KONG

12	Go-Rera Mafoko A A Molemo Mo Hong Kong.....	26
13	Go-Direla Modimo Mo Hong Kong.....	29

## Thulaganyo 1

Tlhogo ya Kabelo: LOKWALO LWA GA JONA

Tlhogo ya Gompieno: JONA--O TSAMAYA KGAKALA LE MODIMO

Temana ya Tlhogo:

"Ke gone tsamayang, lo dire merafe yotlhe barutwa, lo ba kolobetse mo leineng la Rara, le la Morwa, le la Mowa O O Boitshepo: Lo ba ruc go tlhokomela dilo tsotlhe tse ke di lo laoletseng: me bonang, ke bo ke nntse ke na le lona ka metlha yotlhe, le go ya bokhutlong jwa metlha." (Mathaio 28:19-20).

### MOETELEDI-PELE WA THULAGANYO:

Kgwedi e re tla ithuta lokwalo lwa ga Jona. Lokwalo lo kwadilwe ke Jona, moporofeti wa Modimo. Leina la gagwe, la Jona, le raya leeba (lephoi), le re le gopolang e le nonyane e e bonolo, e e lorato. Jona ga a ka a dira ka nako yotlhe mo botshelong jwa gagwe se se rewang ke leina la gagwe.

Jona e ne e le moporofeti mme a tlhaloganya fa Modimo O bitsa. Mo lokwalong lwa gagwe, o supa Modimo O bua le ene kaga tiro e Modimo O e mmeetseng. Lwa-bofelo, o supa Modimo O bua le ene ka tsela e senotseng kutlwelo-botlhoko jwa Modimo le bopelonomi jwa One mo go bathung botlhe mo lefatshing lotlhe.

### KAROLO YA NTLHA: Pitso ya ga Jona le Go-se-utlwe

Modimo O buile le Jona mo kgaolong ya ntlha, ditemana 1-3. O boletse Jona go ya kwa motseng mogolo wa Ninefe, me go buela kwa-ntle kgatlhanong le bosula jwa one. Jona o itsile kaga motse wa Ninefe ka gore o ne a nna mo "mmileng ya merafe" mme a utlwa dikgang tsa motse wa Ninefe. Jona o itsile gore o (motse) ne o le motona le gore mefuta yotlhe ya dilo tsa bosula e ne e dirwa teng.

Jona o ne a sa rate batho ba Ninefe. O ne a sa rate go ya kwa motseng oo go buela kwa-ntle kgatlhanong le dilo tsa bosula tse ba ne ba di dira. O ne a sa ba batle go ikwatlhaya le go bolokwa. Jona a ikaelela go tsamaya kgakala le pitso ya Modimo. A ya Jopa mme a reka thekethe mo sekepeng se se yang ntlha e nngwe ya Ninefe.

Jaaka fa batho ba Ninefe ba ne ba nntse ba le bosula, Jona ga a ka a gopola gore ba tlhoka nako ya go bolokwa. Ba tshwanetse go oatlhaelwa bosula jwa bone. Jona o ne a sa lekanye sebe ka tsela e Modimo O se lekanyang ka yone. Mo go ene motho yo o nang le sebe se se "nnye" o ne a tlhoka go nna le lobaka lwa go ikwatlhaya, mme motho yo o nang le sebe se "setona" o ne a sa tlhoke (go ikwatlhaya le go bolokwa).

A le rona, jaaka Jona, nako nngwe re lebala gore sebe sotlhe, lefa se le kac. se maswe mo ponong ya Modimo? A go-se-utlwe Modimo ke sebe? Mo go Luke 19:10, Jesu O rile, "Morwa Motho O tsile go batla le go boloka balatlhegi." Mongwe le mongwe o tlhoka lobaka lwa go utlwa mafoko a a molemo mme a bolokwa.

### **KAROLO YA BOBEDI: Jona Mo Lewatleng**

Sekepe se Jona o ne a se palame se ne se ya kgakala le Ninefe. Morago ga mosepele o simologile, sefefe se se boitshegang se a tla mo lewatleng. Molaodi wa sekepe le batho ba gagwe ba ne ba rapela medimo ya bone go ba boloka le sekepe. Jona o ne a le kwa tlase mo sekepeng a robetse. Go-se-utlwe Modimo ga gagwe go ne go mo lapisitse thata. Molaodi wa sekepe le banna ba gagwe ba mo omanyeditse go robala mme a sa rapele Modimo wa gagwe.

Fa re sa utlwe Modimo go na le boeleele jwa se-mowa mo matshelong a rona. Re leka go iphapaanya le se Modimo O re batlang re se dira, mme re tswalela dilo tsa se-mowa mogopolo wa rona. Re iphenya ka gore ga go tsenye ope gape. Mme jaaka phoso ya ga Jona e ne e tsenya gare banna ba lewatle le rona re tsenya ba ba mo tikologong ya rona mo go go se-utlweng ga rona. Fa monna le mosadi ba ikaelela gore ga ba kake ba tlhola ba nna mmogo, kakanyo ya bone e tsenya bana, batsadi, le ba lolwapa botlhe.

Paulo o re gakolola mo go Baroma 14:21, gore, "Ga go molemo go ja nama gongwe go nwa bojalwa gongwe go dira sengwe se se kgopiaang morwa-rrago (wa gaeno)." Fa o sa utlwe, a o kgopisa yo mongwe? Fa o ikaelela go se ye kobamelong mme go ya borekisetso gongwe go ya moketeng kwa motseng gongwe kwa toropong, a o kgopisa mongwe mo go ba lolwapa lwa gago gongwe mokaulengwe wa gago? Jaaka re dira dikakanyo tsa rona letsatsi le letsatsi, re tlhoka go akanya gore kakanyo nngwe le nngwe e tla ama ba re nang le bone jang.

### **KAROLO YA BORARO: Koatlhao ya ga Jona le Kgololo ya Gagwe**

Mo kgaolong ya 1:8, banna ba lewatle ba simolola go botsa Jona mefuta yotlhe ya dipotso. Mo tumelong ya bone ya seheitane, ba dumetse gore motho a le nosi yo o molato o ne a ama ba ba fa go ene mo koatlhaong, lefa ba ne ba sena molato. Banna ba sekepe ba batlile go itse gore e ne e le mang, gore o ne a tswa kac, le gore o ne a dirile eng se se ba diretseng bosula botlhe. A o gakologela o dira sengwe se se diretseng motho yo mongwe mathata? Motho yoo o batla go itse gore o diretseng se o se dirileng. Motho yoo gape o batla go itse gore o se diretseng kwa-ntle ga go botsa!

Jona o ipoletse sebe sa gagwe. (1:9-10). Lefa a ne a dira boipolelo jwa gagwe, o kgonne go supela banna ba lewatle. Jona o itsile go-rata ga Modimo, gore o tshwanetse go latlhelwa mo lewatleng jaaka koatlhao ya go se-utlwe ga gagwe. Modimo ga O wa ka wa direla Jona motlhofo go boela mo go-rateng ga One. Mme go ne go le motlhofo thata go na le go dira loso lwa batsamaisi ba sekepe (banna ba lewatle).

Banna ba lewatle pele ba lekile go boela kwa lefatshing. Ka bonako ba lemoga fa ba tshwanetse go latlhela Jona kwa-ntle (go tswa mo sekepeng). Modimo O ne O baakantse tlhapi e tona go metsa Jona. Fa Jona a le mo teng ga tlhapi malatsi a mararo le masigo a mararo jalo ga tla poloko, jalo Jesu Keresete O ne a le mo mmung malatsi a mararo le masigo a mararo mme A tsogela poloko ya rona ka Keresete yo o tshelang. (Bala Mathaio 12:39-40).

### **MOETELEDI-PELE WA THULAGANYO:**

Mo thulaganyong ya rona gompieno re bone gore go diragala eng fa motho a sa utlwe Modimo. Jona o ne a ila batho ba Ninefe mme a sa ba batle ba bolokwa. Mme se ga se tsela ya Modimo, tsela ya kilo. Modimo O rata batho bothle ba merafe yotlhe. O batlile go naya batho ba Ninefe lobaka lwa go ikwatlhaya. Modimo O nntse O ratile Jona lefa a ne a seka a utlwa. O oatlhaile Jona, mme O thusitse Jona go boela mo go se o ne a tshwanetse go se dira. Jona o ne a bolokwa ka gore o ne a ikwatlhaya.

Dipotso dingwe ke tse tsa go di gopola fa o rapela:

1. A Bakeresete ka nako e nngwe ba ila batho ka gore ba tswa mo tshabeng e sele?
2. Gongwe gore ba dira madi a mantsi?
3. Gore gongwe ba na le thuto e nnye (ga ba a rutega)?
4. Gongwe gore ba rutegile thata?
5. A se ke tsela ya Modimo?

### **NAKO YA THAPELO**

## Thulaganyo 2

Tlhogo ya Kabelo: LOKWALO LWA GA JONA

Tlhogo ya Gompieno: JONA--O TSAMAYA LE MODIMO

Temana ya Tlhogo:

"...A le rona re latlheng bokete bongwe le bongwe, le bolelo jo bo bofefo go re rareetsa, me a re sianeng ka bopelotelele tshiano e re beilweng pele." (Bahebera 12:1)

### **MOETELEDI-PELE WA THULAGANYO:**

Gompieno re tswelela go ithuta kaga Jona jaaka a boetse kwa Modimong. Ka gore Modimo O ne O rata Jona, me Wa otlhaya Jona. Fa Modimo O otlhaya, re seka ra ngodiega. Modimo O otlhaya bana ba One ka gore Oa ba rata. O batla kutlo ya rona mme fa re fapoga, O re gakolola gore Oa tlhokomela ka go re otlhaya.

Ka nako e re otlhaiwang ka yone, gantsi go thata go akanya molemo ope o o tswang mo go gone (go otlhaiwa). Go botlhoko thata ka nako eo. Paulo o re raya a re mo ga Bahebera 12:11b, "kwa morago e unywa loungo lwa kagiso lwa tshiamo mo go ba e ba rutetsweng."

### **KAROLO YA NTLHA: Thapelo ya ga Jona le Kgololo**

A o ka akanya mongwe a ka itumela a a go nna mo mpeng ya tlhapi? Jona o ne a itumetse. O ne a itumetse ka gore o ne a bolokegile mo go nweleng (go betwa). O ne a otlhaetswe kwa ntlheng ya loso lwa se-nama. Loungo e ne ya nna ntshafatso ya botshelo jwa se-mowa. Jona o lemogile gore Modimo O ne O laola. O bone boseng-sepe jwa go tlhopho tsela ya gagwe boemong jwa tsela ya Modimo. Fa a ithutile thuto ya gagwe, o ne a siametse go dira go-rata ga Modimo.

Jona ga a ka a nna fela malatsi a le mararo le masigo a le mararo mo tlhaping, fela jaaka Keresete mo phupung. Ene, jaaka Keresete, o ne a ntshetsa batho ba lefatshe botshelo jwa gagwe. Jona e ne e le ene Mojuta fela mo sekepeng. A ba boloka ka go ineela go latlhelwa kwa-ntle ga sekepe.

Morweetsana mongwe yo o na a una gaufi le nna ka nako nngwe o ne a shele thata. Batho ba ne ba iphapaanya le go mo leba, le eleng morwawe yo monnye. Mo phetolong ya potso ya me ya gore go diregile eng, mokaulengwe yo mongwe a bolela polelo ya gagwe. Fa morwawe yo monnye a ne a sale monnye thata, legae la bone le ne la tshwara molelo (la sha). Mme yo mmotlana yoo, fela a goroga a tswa go ga metsi, a itlhaganelela mo tlung go boloka losea lwa gagwe lo lo robetseng. A sireletsa losea ka mmele wa gagwe. Ka ntlha ya moe o ne a batla go bolawa ke molelo. Mokaulengwe o rile batho ba le bantsi ba ba gaufi ba ne ba amegile ka gore morwa yo monnye o ne a mo tshaga (mmagwe) mme o ne a dira go-se-utlwe. Bangwe ba , ba ba botsa fa botshelo jwa gagwe (mosimane) bo lekana le seo (mmagwe) fetileng mo go sone. Phetolo mo go mme ka metlha e tsile ka bonako, a re, "Ke ka se dira gape go boloka ngwanake."

Ba kae ba rona ba ba ka ithaopang (ineelang) go swa ka ntlha ya ba bangwe? Gongwe go ka nna motlhofo thata go ineela ba lolwapa lwa rona boemong jwa tshaba gongwe lefatshe le lengwe. Mme Modimo O re supetsa ka polelo ya ga Jona le Keresete gore re rate go ya kwa bathong botlhe ba lefatshe, mme eseng ba ba mo motseng wa rona gongwe mo toropong go le gosi.

### **KAROLO YA BOBEDI: Kutlo ya ga Jona**

Mo go Jona 3:1, Modimo gape O bolelela Jona go ya kwa Ninefe go rera molaetsa o Modimo mo o neetseng. Jona o obametse Morena mme a ya kwa motseng o mogolo Ninefe. Motse o ne o le motona thata mo go tshotseng malatsi a mararo go o kopanya (go o tsamaya gotlhe). Morago ga mosepele wa letsatsi mo motseng o mogolo, Jona o ne a tlhagisa batho gore motse o tla digiwa mo malatsing a le masome mane. O ne a isitse molaetsa wa Modimo kwa bathong ba Ninefe.

Gopola lefelo kwa go ka go tsayang malatsi a le mararo go goroga. Jaanong akanya lefelo leo lotlhe le tletse batho. Matlo a bapile thata. Ka tsela e, o bona tlhaloganyo gore Ninefe o ne a le botona bo-kae. Ka gore Jona o utlwile, o ne a naya batho ba motse o, nako ya go ikwatlhaya. A re utlwa le go tlhagisa batho ka katlholo ya bone kwa-ntle ga Jesu jaaka Mmoloki? A o ganne go ya go ba bolelela ka gore batho ba ba bosula bao ba tshwanetse go swa? A o ka bidiwa Jona nako nngwe? Fa mongwe a sa utlwe Modimo, bontsi bo ka swa ka ntlha ya go-se-utlwe.

### **KAROLO YA BORARO: Ninefe O a ikwatlhaya**

Batho ba Ninefe ba ne ba dumela mme ba ikwatlhaya. Ba bolela boitimo (go itima dijo) mme ba apara dikhai (matsela) tsa kgetse. Khai ya kgetse e ne e le letlalo ba boboa jwa podi le apariwa mo mmeling ka nako ya kutlo-botlhoko. Fa kgosi e utlwile, e rometse taolo gore lefa e le motho gongwe phologolo e seka ya ja gongwe go nwa le gore motho le phologolo ka go tshwana e ne e apesiwa khai ya kgetse. Ka seemo se sa boikwatlhao le boikokobetso, gongwe Modimo O ne O santse O ka itshwarela motse. Ba ne ba beile tsholofelo ya bone mo ntlheng ya gore Modimo O rometse tlhagiso. Ba ne ba tlhwafetse thata kaga boikwatlhao jwa bone. Modimo O bone ditiro tsa bone le gore ba ikwatlhaile ka boamaruri Modimo O ne wa boloka Ninefe.

Jona o ne a kopilwe fela go tlhagisa batho ba Ninefe. Kgato e nngwe e ne e le mo bathong ka bo bone. Ba ne ba kabo ba tlhophile go se ikwatlhaye. Tlhopho e ne e le ya bone, mme Modimo Wa amogela boikwatlhao jwa bone. Tshwanelo ya rona ke go supa. Mowa O O Boitshepo O boloka mewa (batho). Modimo O ka nna wa seka wa re romela kwa-ntle kwa motsing ka tsela e O e dirileng ka Jona, mme O re romela mo bathong ba re ba bonang malatsi otlhe. Fa re ya kwa bankeng, kwa borekisetso, kwa Ntlong ya Poso, go etela mokaulengwe, re na le lobaka lwa go supela mongwe kaga Jesu. Fa re tsamaya le Modimo, re tla bo re leka malatsi otlhe go itsise mongwe go itse mafoko a a molemo a poloko ka Jesu Keresete.

### **MOETELEDI-PELE WA THULAGANYO:**

Go gontle jang go bona maungo a batho ba ba tlhagisitswe ka tshetso ya bone! Ka bonako ba ikwatlhaile, mme Modimo O ba golotse. Ke boitumelo jwa rona jang fa re supela batho ba ba latlhegileng mme re ba bona ba ikwatlhaya mme ba amogela Jesu Keresete jaaka Morena le Mmoloki.

Jaaka re na le nako ya rona ya thapelo, a re tlhomaganyeng batho bangwe le mafelo ba re ba itseng, ba ba tlhokang go utlwa kaga tshetso ya bone. A re bueng ka metsotso e se-kae kaga gore ba ka tlhagisiwa jang. Fa ba le gaufi le rona, a re ka akanya gore re ka ba supela jang? Fa ba le kgakala, a re na le moruti koo go ba rapelela, a kgotsa re tlhoka go rapela mongwe (moruti) gore a romelwe koo?

Jaanong a re tseyeng nako go rapelela dipaka tsa go supela ba bangwe kaga Jesu. Lwa bofelo, rapelelang go nna pelokgale ka Jesu.

### **NAKO YA THAPELO**

Thulaganyo 3

Tlhogo ya Kabelo: LOKWALO LWA GA JONA

Tlhogo ya Gompieno: JONA--O TSAMAYA KWA PELE GA MODIMO

Temana ya Tlhogo:

"Nnang fela mme lo itse fa ke le Modimo..." (Pesalema 46:10)

### **MOETELEDI-PELE WA THULAGANYO:**

Gompieno re fetsa Thuto ya rona ya Baebela ya ga Jona. Pele Jona o lekile go tsamaya kgakala le Modimo le mo molaong wa One. Ka bonako o bone gore ga o kake wa tshaba Modimo go iphitlha. Modimo, O gotlhe. Morago ga a sena go ikwatlhaya, Modimo O neile Jona tiro ya gagwe. Lwa-bofelo o ne a tsamaya le Modimo. Mme gompieno re fitlhela mo kgaolong ya bone gore Jona o tsamaya kwa pele ga Modimo. Gantsi-ntsi thata re tshwana le Jona, re sa tsamaye le Modimo, mme re tsamayela kwa pele ga Modimo.

Mo lokwalong lwa ga Hosea re gakololwa go lebelela Morena. Re fitlhela mo go Hosea 12:6, "Mme wena, ka thuso ya Modimo wa gago, boa, tshegetsela lorato le boutlwelo-botlhoko, mme lebelela Modimo wa gago ka go tswelala." O seka wa O feta, mme lebelela Modimo. Tsamaya le Modimo.

Bontsi jwa rona re na le ba ditokolo tsa malwapa a rona, ditsala, gongwe bakaulengwe ba re ka ratang go ba bona ba amogela Jesu Keresete jaaka Mmoloki. Tiro e ka nna motlhofo thata fa re ka ba amogelela (Jesu). Gongwe fa re ka ba pateletsa go tla kwa go Jesu. Mme se ga se tsela ya Modimo. Motho mongwe le mongwe o tshwanetse go itlhophela ka bo-ene. Nako nngwe re rata go dira dilo pele ga nako e siame. Re feta leano la Modimo boemong jwa go bua le One le go tsamaya le One. Re na le mathata fela jaaka Jona.

### **KAROLO YA NTLHA: Boitumologo jwa ga Jona**

Ijo! Ijo!, mme Jona o ne a sa itumele! Bogale jwa gagwe bo ne bo mo fisa go tloga ka tlhogo go ya kwa dinaong. Boikgodiso jwa gagwe bo ne bo utlwa botlhoko ka gore o ne a dirilwe go lebega jaaka moporofeti wa mmaka. O ne a sa amege ka tlotlo ya Modimo. O ne a amega ka tlotlo ya gagwe ka bo-ene. O ne a bua le Modimo kaga seemo seo. A re, "Jaanong Morena, ke sone se ke ne ka tsamaile kgakala ka seemo sa pele. Ke itsile gore O ka nna le boutlwelo-botlhoko mo bathong ba ba bosula ba. Jaanong O ntirile seelele (sematla). Ba tla ntshega mme ba mpitsa moporofeti wa maaka. Go botoka mo go nna go swa." Jona o ne a amegile thata kaga tlotlo ya gagwe jaaka moporofeti, gore o fositse boitumelo jwa batho ka gore ba ne ba tlhagisitswe.

Go ka nna le dinako tse re kabakanyang go supa mo setlhopheng, gongwe mo mothong ka gore re tshaba gore ba tla re tshega. Re ka kabakanya go leka go dirisa puo (loleme) ya batho ba bangwe gongwe ya morafe ka gore gongwe ba ka tshega go bua mafoko ga rona. Re tlhoka go gakologela gore Jesu O ne a sotlwa. Ba ne ba Mo tshega mme ba Mmetsa (itaya). Mme, galaletsang leina la Gagwe, Jesu O sule mme O tsogile gape gore re tle re nne le botshelo jo bo sakhutleng.

### **KAROLO YA BOBEDI: Jona le Menamo ya Segwana**

Fa Morena A utlwile Jona a re go kabo go le botoka mo go ene go swa boemong jwa go tshela, Morena One a botsa Jona gore o na le tshwanelo ya eng ya go nna bogale. Jona o ne a tswela kwa-ntle ga motse, mme a itirela loobo, mme a nna kafa tlase ga loobo go leta le go bona se se ka diragalang. Fa a nntse foo a kgopilwe, Modimo wa tlhogisa menamo go tlhoga fa godimo ga Jona go mo naya moruti le go mmaya sentle. Jona o ne a itumeletse moruti. O ne a tswana le mosimanyana yo o tswetseng kwa-ntle go nna a kgopilwe ka gore a se kake a ya kwa tlung ya tsala. Jalo mmagwe (mosimanyana) a tla go mo fa seno se se tsididi. O ne a itumetse go bona seno, mme ka kotsi (tshoganyetso) a tsholola seno. Jalo o ne a galefa gape. Seboko se ne sa tla mme sa bolaya menamo ya segwana. Jalo Jona o ne a galefa mme a ipaakanyetsa go swa gape. Phefo e ne e fisa le letsatsi le ne le le molelo. Jona o ne a le gaufi le go idibala. Jalo a ikutlwa go le botoka mo go ene go swa.

Jona o ne a dira jaaka ngwana mme go ikgopotse ene fela. A re dirile jaaka Jona nako nngwe? Fa thulaganyo e sa dirwa ka tsela e re batlang e dirilwe, a re a kgopiwa mme re gana go dira gape mo thulaganyong? Mo lokwalong lwa Baefesia, Paulo o re gakolola gore ga re kake ra nna jaaka bana ba se-mowa, mme re tshwanetse go gola jaaka Keresete mme re galaletse. (Bala Baefesia 4:14-16). Ga re kake ra tswelela go gopola sebele fela. Re tshwanetse go golela go tswana le Keresete mme re tshela matshelo a rona gore ba bangwe ba tla itse gore Jesu ke Morena wa matshelo a rona.

### **KAROLO YA BORARO: Jona O Ithuta kaga Boutlwelo-botlhoko jwa Modimo**

Jona 4:9 o supa gape Modimo O botsa Jona gore o ne la tshwanelo efe ya go nna bogale. Modimo O kgalemotse Jona mme wa mo supetsa se se tshwanetseng go tla pele. O gakolotse Jona gore o tlhomogetse pelo menamo e o sa e ntshetsang go berekiwa gongwe go thusiwa go gola. Modimo O reile Jona wa re o galefiwa menamo e e medileng ka letsatsi mme sa ba sa nyelela ka letsatsi. Modimo O tlhomogetse pelo le kutlwelo-botlhoko batho ba ba dikete tse di makgolo a mabedi le dikgomo tse dintsi mo Ninefe. Ke eng fa Jona a ne a emegile ka menamo mme a sena kutlwelo-botlhoko mo go botlhe ba ba mo motseng? A moruti (wa setlhare) mo go Jona o ne o tlhokega thata go feta matshelo a botlhe ba ba mo motseng wa Ninefe? Modimo O ne O gakolola le go supetsa Jona gape gore O (Modimo) rata dibopiwa tsotlhe.

Eseng batho fela, le dikgomo le tsone! Mme Modimo O badile batho gongwe bana ba ba ne ba se kake ba ithusa, eseng O balela bao ba itsileng letsogo le letona (la major) mo go la molema.

Modimo O tlhodile dilo tsotlhe mme O na le kutlwelo-botlhoko mo diphologolong jaaka O dira mo bathong. Fa re tshwanetse go gola go nna jaaka Keresete, re tshwanetse go rata dilo tsotlhe jaaka Modimo O rata dilo tsotlhe. Re tshwanetse go nna le kutlwelo-botlhoko mo bathong mme re ba tlhagise. Re tshwanetse go gakologelwa bana ba ba sa itseng go dira se se siameng go fitlhela re ba ruta. Re tshwanetse go tlhokomela le go rata diphologolo tse di sa bueng (semumu). Re tshwanetse go ithuta lorato lwa Modimo.

### **MOETELEDI-PELE WA THULAGANYO:**

Go gontsi mo go ithutiwang mo polelong ya go Jona! Fa re tla kwa bofelong jwa lokwalo, re bona gape go tshwantshiwa ga Morena wa rona Jesu. Modimo O supetsa Jona gore O rata batho botlhe. Morafe gongwe mmala ga o dire pharologanyo. Jesu O re laola go ya mo metseng yotlhe ya lefatshe mme re ba bolelele mafoko a a molemo a poloko. Fa setlhopha sengwe se amogetse, re ruta mme re dira barutwa (Mathaio 28:19-20). Fa ba gana re tlhotlhora lorole mo dinanong tsa rona mme re ya go fa setlhopha se sengwe lobaka lwa go utlwa lefoko.

Jaaka re tswala thuto ya ga Jona, a re tseyeng nako ya go ithapelela:

1. Gore re seka ra supa ikelamelo (boikgodiso) mo go supeleng Morena wa rona Jesu.
2. Gore re nne le lobaka beke le beke go gogela mongwe kwa go Jesu. E ka nna batho ba le 52 mo ngwageng!

### **NAKO YA THAPELO**

## Thulaganyo 4

Tlhogo ya Kabelo: KE ENG SE SE KA RE KGAOGANYANG LE LORATO LWA MODIMO?

Tlhogo ya Gompieno: GO LEBAGANA LE LOSO KWA-NTLE GA POIFO

Temana ya Tlhogo:

"Mme fa ke ya go lo baakanyetsa bonno, ke tla tla gape, me ke tla lo itsholela; gore kwa ke gona le lona le nne gona." (Johane 14:3)

### **MOETELEDI-PELE WA THULAGANYO:**

Ke eng fa batho ba tshaba loso? (O tshwanetse go botsa potso e jaanong mo setlhopheng ka tsela e e ba gogelang go naya dikarabo gore o tle o ba gogele mo buisanyong ya thuto). Ke setho go tlhogafala kaga se se sa itsegeng mo go rona mo botshelong jo. Sekai ke mo go baakanyetseng go tsamaya mosepele o moleele ka sepalamo se se tsayang batho, o ya lwa-ntlha kwa lefelong le o iseng o ke o le ye. A bese (sepalamo) ya me e tla goroga ka nna kwa toropong e e rileng ka nako e e ntshiametseng go tshwara (palama) terena e e tswang ka nako e e rileng? Ke tla dira eng fa ke fosa terena ka gore ga go na e nngwe go fitlhelela ka Labone? Gongwe gore ke tla dira eng fa bese gongwe terena e robegela mo tseleng? O tthagafetse kaga mosepele ka gore loso lo tla nna jang. Lefa e le rona ga re itse gore loso lo tla nna jang. Baebele e na le ditshupo di le dintsi mo losong le mo botshelong morago ga loso mo go ba ba dumelang mo go One.

### **KAROLO YA NTLHA: Loso Ke Eng?**

Loso ke botshelo bo tlogela mmele. Ka loso mmele ga o tshole o na le tiro lefa e le tlotlhwana mo lefatshing. O (mmele) tshwanetse go lathiwa (go fitlhwana). Mme mmele ga se motho. Ke mo motho o ne a tshela teng fa a ne a santse a tshela. Motho mongwe le mongwe ke mowa o o tswelelang go tshela morago ga loso. Bakeresete ba dumela le go itse mo dipelong tsa bone gore loso ke kgoro e e ba gogelang kwa Modimong le kwa botsalanong le One, ka tsela e e farologanyeng. Jalo a go tshwanetse go nna le poifo mo go rona le ka ba re ba ratang?

### **KAROLO YA BOBEDI: Go-lebagana le Loso, Wena ka Bo-wena**

Batho ba le bantsi, le eleng Bakeresete, ga ba batle go gopola gongwe go bua ka go-swa, mme ke sengwe se se tla tlang mo bathong botlhe. Lo tla tlela bangwe ba santse ba le ba botlana thata, bangwe ba le mo dingwageng tse di fa gare, mme bangwe ba le mo dingwageng tsa bogolo. Ka gore loso lo re lebananye rotlhe, jalo go siame gore re lo neele kgopolo e e tthagafetseng le maikutlo a rona ka lone.

Setefane o ne a bolaiwa ka maje mme o itsile gore o tla swa. O lebaganye le go-swa jang? (Bala Ditiro 7:54-60). A Setefane o tshabile go-swa? Kamego ya gagwe e ne e le ka ba bangwe, le eleng bao ba ne ba dira loso lwa gagwe.

Go lebega gore Moaposetoloi Paulo o na a lebelo le eleng nako ya loso lwa gagwe kwa pele ka boipelo, ka gore e ne e le nako ya gagwe go nna le Keresete. "Gonne mo go nna go tshela ke Keresete, mme go swa ke phenyoo. Fa go tshela mo nameng, go raya lone loungo lwa tiro ya me, jalo se ke tla se itlhophelang ga ke kake ka se bolela. Ke pitlaganye ga gare ga dilo tse pedi. Keletso ya me ke go tsamaya go ya go nna le Keresete, gonne mo go molemo thata" (Bafilipi 1:21-23).

Banna ba babedi ba ga ba a ka ba tshaba loso ka ntlha ya tumelo ya bone mo Modimong. Ba ne ba amogela mme ba dumela tsholofetso ya ga Keresete gore ga tla nna le Ene. (Bala Johane 14:1-3).

### **KAROLO YA BORARO: Go-amogela Loso lwa Moratiwa**

Loso lwa moratiwa lo lere khutsafalo mo go bao ba rona ba re setseng ka gore go raya gore ga re kake ra tlhola re nna le ene fa, mo lefatshing. Ke tlhologo go hutsafala le eleng go tsholola dikeledi ka ntlha ya khutsafalo ya rona. Fa yo, yo o suleng e ne e le Mokeresete, jalo re tshwanetse go lebogela Modimo tlhomamiso e o re e fileng gore ene yoo o na le Keresete ka bosakhutleng.

"Jesu a mo raya a re, Ke nna tsogo le botshelo; yo o dumelang mo go nna, lefa a swa, lefa go ntse jalo o tla tshela, mme lefa e le mang yo o tshelang mme a dumela mo go nna ga a ketla a swa" (Johane 11:25-26).

### **KAROLO YA BONE: Go-thusa Yo Mongwe Yo O Tlhokofaditsweng ke Loso**

Jaaka Bakeresete re ka gogelwa ke Modimo kwa lolwapeng lo lo la tlhegetsweng ke moratiwa. Ga go motlhofo ka dinako tsotlhe go supa ka nako e e ntseng jaana. Mo o ba ba bangwe ke mokgwa go kua le go lelela kwa godimo fa go na le loso. Mokeresete o ka utlwa-botlhoko le ba ba swetsweng mme eseng ka go tsaya karolo mo ditirong tse.

Ka nako e e tshwanetseng fa ba-lolwapa ba didimetse, jalo Mokeresete o ka kopana le bone a abelana tsholofelo ya gagwe mo go Jesu Keresete. Fa lolwapa lo lo tlhokafaletsweng e le lwa Sekeresete, jalo mokaulengwe wa Mokeresete o ka nna kgomotso tota le nonofo ka nako e. Ka nako ya go kopana jaaka badumedi mo go Keresete, nonofo e ka tla mme masego a nnete a ka itsiwe le eleng ka nako ya botlhoko.

### **MOETELEDI-PELE WA THULAGANYO:**

Ka puisanyo ya rona re ka bona gore loso ke tlhologo tota le karolo e e tlhomamisegang ya botshelo jwa rona fa, mo lefatshing. Fa o bona gore o tshaba loso wena, mme o tshabela ba lolwapa lwa gago loso, leka go akanya kaga gona (go-tshaba) mme o tle go tlhologanya ntlha ya poifo e. Bala gape ditemana tse tsa Baebele tse di amang loso. Mo ditemaneng tse batla ditsholofetso tsa botshelo morago ga loso. Ipotse dipotso tse:

1. A ruri ke ikanya le go dumela mo Modimong O O thata yotlhe?
2. A Modimo ruri O kgona go fa botshelo jo bo sa khutleng?
3. A ruri Keresete O intsheditse botshelo jwa Gagwe gore ke seka ka swela mo sebeng?

Fa o sa itse go araba dipotso tse, jalo kopa moruti wa gago go bua le wena kaga tsone.

Rapelang gore Modimo O tla phimola mo go rona, poifo yotlhe ya loso gore re nne le tsholofelo e e tletseng ya botshelo jo bo sa khutleng mo go One. A re bueng le Paulo re re mo go Baroma 8:38. Balang mo go temana e.

### **NAKO YA THAPELO**

## Thulaganyo 5

Tlhogo ya Kabelo: KE ENG SE SE KA RE KGAOGANYANG LE LORATO LWA MODIMO?

Tlhogo ya Gompiano: MASWABI MO LOLWAPENG KA NTLHA YA GO SE TSALE BANA GONGWE GO TSALA BANA BA MOFUTA O LE MONGWE-FELA (BASIMANE GONGWE BASETSANA)

Temana ya Tlhogo:

"...Tshegofatso ya me e go lekanye; gonne thata ya me e lekanyediwa mo bokoeng.." (2 Bakorintha 12:9a)

### **MOETELEDI-PELE WA THULAGANYO:**

Fa mosadi le monna ba ratana mme ba nyalana selo sa tlholego ke go batla bana go tsalwa mo kopanong e. Bana ba lere boitumelo mo legaeng, mme ba (bana) tsewa jaaka lesego le le tswang Modimong. A se se raya gore Modimo ga O lebe ka thekegelo mo nyalong e? Ga se jalo gotlhe-gotlhe! A se se raya gore seo ga se lonyalo lwa nnete le gore mo ponong ya Modimo ba ka kgaogana mme ba nyala gape? Gape se ga se reye jalo. A re boneng gore a re dumelana le se mokwadi wa thulaganyo o ka se buang.

### **KAROLO YA NTLHA: Lonyalo Kwa-ntle Ga Bana**

Fa go sena bana ba ba tsalwang mo legaeng, ka metlha go na le maswabi mo monneng le mo mosading. Mo dinyalong dingwe mosadi o ithwala ka bonako, mme mo go di dingwe go tsaya lobaka. Go siametse monna le mosadi go bua kaga keletso ya bone go tsala ngwana. Go ya kwa go ba kokelwana ya go tsaya (tsala) bana ka thulaganyo gongwe kwa ngakeng gantsi go tla thusa go bona gore a go na le mathata mo mmeling. Mmogo le go leka go bona thuso ya ngaka, rapelang gape lo kopa Modimo go lo segofatsa ka bana fa e le go-rata ga One. Gakologelwang gore Sara le Hana mo Baebeleng ba ne ba fiwa bana morago ga go leta ka dingwaga le thapelo.

### **KAROLO YA BOBEDI: Masego le Eleng go Sena Bana**

Bala Mathaio 19:5-6. Jaanong gompiano banna ba le bantsi ba simolola go akanya go tsaya mosadi yo mongwe fa mosadi wa ntlha a sa mo tsalela ngwana. Lefa a rata mosadi wa gagwe keletso ya ngwana e nna ntsi go feta lorato lwa gagwe (monna) mo go ene (mosadi). Se se kgatlhanong le thuto ya ga Keresete. O rile, "Mme ba babedi ba tla nna selo se le sengwe fela." Ga a A re, "Fa ba na le ngwana, ba tla nna nama e le nngwe-fela." Monna le mosadi ke nama e le nngwe-fela, go tsalwa bana lefa ba sa tsalwe.

Monna le mosadi ba ka itumela lefa go sena bana. Ga go ketla go nna tiragalo (ya nnete) kwa-ntle ga bana e ne e ka nna teng fa bana ba le teng, mme Modimo O ka segofatsa legae le gape. Mosadi o tshwanetse go lebogela Modimo kopano ya gagwe le monna wa gagwe mme a O kope go mo thusa go nna mosadi yo o mo (monna) siametseng. Mosadi a seka a baya monna molato fa go sa tsalwe bana. Fela jalo monna a seka a kgala (baya molato) mosadi.

## **KAROLO YA BORARO: Go-amogela Dilo Tse Re Se Kakeng Ra Di Fetola**

Mo Afrika jaanong banyalani ba le bantsi ba ba senang bana ba godisa bana ba ba senang batsadi ba ba tshelang gongwe ba batsadi ba bone ba se kakeng ba ba tlhokomela. Se ka thuso thata mo go bone (banyalani) le mo ngwaneng fa monna le mosadi ba dumelana go dira se mmogo. Ba ka tsaya losea gongwe ngwana yo jaaka wa bone tota. Mme lefa ba sa godise gongwe ba se kake ba godisa ngwana (yo eseng wa bone), banyalani ba ba santse ba ka tlotlwa mme ba dirisiwa mo motseng wa bone le mo kerekeng. Se ga se a tshwanela le eleng lefa ba ka nna kwa gaeng mme ba tshelela mo maswabing a bone a go se nne le ngwana. Fa ba dira se mme ba tswela ka go ikutlwela-botlhoko, ga ba ketla ba itumela mme ga ba kake ba diragatsa go-rata ga Modimo mo matshelong a bone.

Mosadi wa Mokeresete yo o ne a sena bana o boletse gore o batlile bana jang thata mo legaeng la gagwe. O rile mo dingwageng tsa ntlha tsa lonyalo lwa bone ene le monna wa gagwe ba ne ba nna ba leta le go solofela bana. O ledile dikeledi tse dintsi ka gonne sepe se sa direga. Jalo o rile o kopile Modimo go dirisa botshelo jwa gagwe mo tirong ya One. Tshupo ya gagwe ke gore Modimo O mo gogetse mo dikolong mo motseng wa bone go ruta Baebele e o e dirileng dingwaga tse dintsi. Ka tsela e, o thusitse basimane le basetsana go itse Keresete jaaka Mmoloki le Morena wa matshelo a bone. O rile ka tsela e o nntse le makgolo a bana boemong jwa ba se-kae fela. Legae la bone la Sekeresete e ne e le legae le baithuti ba le bantsi ba ba ne ba le kgakala le magae le metse ya bone.

Banyalani ba ba senang bana, ba tshwanetse go ithuta go amogela boopa (go sa tsale ba na) jwa bone, eseng jaaka sekgobo, mme jaaka pitso. Ba go tseye jaaka kaelo e e tswang Modimong. Modimo O ba tlhophetse maikaelelo a a tlhophegileng a ba ka a diragatsang botoka kwa-ntle ga bana ba eleng ba bone. Fa se e le go-rata ga Modimo, O tla ba segofatsa segolo.

## **KAROLO YA BONE: Go Nna le Basimane Fela Gongwe Basetsana Fela**

Banna le basadi ba bantsi ba batla bana ba bone go nna basimane le basetsana, eseng basimane fela gongwe basetsana fela. Mme go siame thata fa ba kgona go nna le bone botlhe, mme fa o na le basimane fela gongwe basetsana fela, jalo se le bale go ba le bogela Modimo. Le bogela Modimo masego a One go ba go fa. Rata mongwe le mongwe ka sebele mme o itse gore Modimo O na le maikaelelo ka botshelo joo.

Se se tlhokegang thata ke go rapela Modimo go go thusa le monna wa gago go nna batsadi ba ba siameng. Rapela Modimo go go goga mo go ruteng basimane le basetsana ba gago dithuto tsa Baebele le gore ba tshwanetse go di latela jang mo matshelong a bone otlhe.

## **MOETELEDI-PELE WA THULAGANYO:**

Moaposetoloi Paulo o rile ga go sepe mo lobopong lotlhe se se ka re kgaoganyang le lorato lwa ga Keresete, lefa e le maswabi ka ntlha ya go se nne le bana. Modimo O re siametse mo go kalo mo go re feng botshelo, boitekanelo, magae, dijo, lorato, poloko le masego a mangwe a mantsi a re se kakeng ra a bua. Re tshwanetse go le bogela Modimo masego ka go tswela boemong jwa go akanya kaga tse re senang natso. Gongwe ke ka ntlha ya molemo wa One gore O bo O sa re di fe.

## **NAKO YA THAPELO**

## Thulaganyo 6

**Tlhogo ya Kabelo: KE ENG SE SE KA RE KGAOGANYANG LE LORATO LWA GA KERESETE**

**Tlhogo ya Gompieno: GO-TLHOMAMA MO TUMELONG KA DITEKO**

**Temana ya Tlhogo:**

"Ga se gore ke bua kaga go tlhoka; gonne ke ithutile gore, lefa ke ka nne mo popegong e e ntse jang. ke be ke itumele fela mo go yone."  
(Bafilipi 4:11).

### **MOETELEDI-PELE WA THULAGANYO:**

Rotlhe ba re tsogileng sentle ka botshelo jo bo siameng re a itlhomamisa. Ga re ntsho kgopolo e ntsi ya gore ke lesego le lekae le. Rona ba re nang le botsogo jo bo siameng gantsi re tshwenyega kaga dilo tse dinnye tsa botshelo jaaka go se nne le dilo tsothle tse re di batlang. Re ka batla madi a mantsi, diaparo, ntlo e e botoka, seromamowa, koloi/kara, le dilo tse dingwe. Fa diteko tse di tla mo lolwapeng lwa rona, jaaka botsogo jo bo maswe, bolwetsi, ngwana yo o golafetseng, bokoa leebana, gongwe go se itekanele ga tihaloganyo, re dira eng mo go tsone?

Jaaka Bakeresete re tshwanetse go di dira jang? A tumelo ya rona e nna e nonofile gongwe a re simolola go belaela bo-gone jwa Modimo le ditsholofetso tsa One mo go rona? Gone jaanong a mongwe le mongwe wa rona a akanye kaga se, mme re ikarabele dipotso tse.

### **KAROLO YA NTLHA: Go-amogela Diteko Mo Tumelong**

Bala Bafilipi 4:11-13. Fa diteko tsa botshelo di tla mo go rona, ga go molato gore ke eng, re ipaakanyetseng go di amogela ka tumelo. A re gakologelweng Jobe le diteko tse dintsi tse o ntseng le tsone. O ne a nna ka boikanyego mo Modimong. Re tshwanetse go dumela gore mo bolwetsing Rara wa rona Wa Legodimo O tla nna le rona lefa re fola ka bonako gongwe gore re bolwetsi jo re tla nnang le go bo itshokela go se-kae.

Moaposetoloi Paulo o rile, "Gonne ke ithutile gore lefa ke le mo popegong efe, ke itumele." Paulo o ne a le kae fa a kwala mafoko a? O ne a le kwa Roma mo kgolegolong, mme o ne itumetse. O ne a amogetse kgolego ya gagwe. O ne a amega ka go supa mo badiseng ba kgolegelo le go thusa ditsala tsa gagwe mo Filipi. Fa o ka bala lokwalo lotlhe lo lo kwaletsweng Bafilipi, o tla lemoga gore ga kae a kwala kaga go-ipela le kaga boipelo (boitumelo) jwa gagwe mo Moreneng. Paulo o ne a kgona go amogela le go itumela mo popegong ya gagwe ka ntlha ya tumelo ya gagwe mo Modimong. Paulo o neetse botshelo jwa gagwe johlhe mo Modimong. Paulo o itse gore Modimo ga O kake wa mo latlha mme O tla nna le ene.

### **KAROLO YA BOBEDI: Go-itumela mo Dipitlaganong tsa Rona ka Tumelo**

Ga se boeleele go re re tshwanetse go itumela mo dipitlaganong tsa rona. A re boneng mafoko a ga Paulo. Bala Baroma 5:3-5. "...me a re itumeleng le mo dipitlaganong tsa rona: ka re itse fa pitlagano e tle e tsose pelotelele: Me pelotelele e tsose boiteko; me boiteko bo tsose tsholofelo; Me tsholofelo ga e tshabise ditlhong; ka gonne lorato lwa Modimo lo thelegetse mo pedung tsa rona ka Mowa o o Boitshepho o re o neilweng."

Fa go na le bolwetsi gongwe bogole, ga go reye gore re bo amogeleng mme re itumele mo go jone kwa-ntle ga go bona ngaka. Nyaa, eseng jalo. Re diriseng botlhale jotlhe jo Modimo O re bo fileng go tlisa bojotlhe mo go rona le mo lolwapeng lwa rona.

Mosadi yo o ne a na le kelelo ya madi ka dingwaga di le lesome le bobedi o ne a ile dingakeng tse dintsi mme a se botoka. O ne a na le tumelo gore fela fa a ka ama seaparo sa ga Jesu, o ka fodisiwa. Jesu O mo reile A re, "Morwadi, tumelo ya gago e go fodisitse, tsamaya ka kagiso, mme o fole mo bolwetsing jwa gago." (Mareko 5:34).

### **KAROLO YA BORARO: Go-rata le Go-thusa Ba Bangwe mo Ditekong**

Gompiano fa re tsamaya mo toropong gongwe mo motseng re ka bona bao ba golafetseng ka tsela nngwe, ba ba nang le leebana, gongwe ba ba nang le tlhaloganyo e e sa itikanelang. Gongwe re ka nna le mongwe mo lolwapeng lwa rona yo o nang le mangwe a mathata a. Re dira eng mo go bone? A re a ba tshaba, re a ba leba, re bua kaga bone gore ba ka utlwa? Gongwe a re leka go tlhaloganyo mathata a bone mme re ba batlele thuso?

Nako nngwe mo Kerekeng ya Baptist fa moruti a rera, mosimanyana a ka nna dingwaga di le lesome le bobedi a simolola go raga-raga ke tshwaro ya leebana. Fa lefelong lo o ne a ntse fa go lone batho botlhe ba simolola go suta go tswa fa mosimaneng ba mo tlogela gongwe go wela fa fa fatshe mme a ikutlwise-botlhoko (bolaesega). Lwa bofelo monna a tswa ntlheng e nngwe ya ntlo a tla mme a mo thusa go ya kwa-ntle kwa o ka rapamang teng. Go kabo go ne go le botoka mo go kae fa ba ba ne ba ntse gaufi le ene ba kabo ba mo neile thuso ka bonako go na le go dira pheretlhego ka go sia.

Leebana ke bolwetsi, mme motho yo bo mo amileng (yo o bo lwalang) a seka a tshabiwa gope fela jaaka motho wa letshoroma a ka tshabiwa. Fa bo tshabiwa, jalo ka metlha ke gore bo tlhalogangwe. Rona jaaka Bakeresete, re tshwanetse go ithuta kaga dilo tse, tse re sa di tlhaloganyeng. Jalo ga re ketla re tshaba malwetsi a, mme re sia re tswa mo go one mme re dira letshwenyo mo bathong (balwetsi) bao.

### **KAROLO YA BONE: Jesu O Ntse le Pelotlhomogi Mo Go Bone**

Mo mafokung a a molemo (a Baebele) re bona sekai sa ga Jesu fa A kopana le batho ba ba nang le mefuta e e tshwanang ya mathata. Mo seemong sengwe le sengwe Jesu O ne A na le lorato le pelotlhomogi mo go bone, mme O ba fodisitse. Re tshwanetse go latela sekai sa ga Jesu. Le gale ga re na nonofo ya go fodisa, mme re ka rata le go naya thuso.

Gantsi mo lolwapeng lo lo nang le ngwana yo o pharologanyo ka ntlha ya bogole gongwe makoa a, ga a ratiwe le go tlhokomelwa jaaka bana ba bangwe. Nako nngwe batsadi ba tshwenngwa ke bothata jo. Ka ntlha ya bogole gongwe bokoa motho yoo gongwe o tlhoka lorato lwa rona thata le kamego go feta ba bangwe ba ba tsogileng sentle.

### **MOETELEDI-PELE WA THULAGANYO:**

Mo thulaganyong e gompiano re gakolotswe gape gore mo pitlaganong nngwe le nngwe ya botshelo re ka itse masego a Modimo ka ntlha ya lorato mo dipelong tsa rona.

A re kopeng Modimo go re goga mo dipitlaganong tsa lefatshe le go re ruta go ikanya mo go One segolo. Kopang Modimo go re thusa go golela mo go One ka ntlha ya diteko tse.

### **NAKO YA THAPELO**

## Thulaganyo 7

Tlhogo ya Kabelo: KE ENG SE SE KA RE KGAOGANYANG LE LORATO LWA GA KERESETE

Tlhogo ya Gompieno: GO LEBAGANA LE MASWABI KA TUMELO

Temana ya Tlhogo:

"Tlang kwano go nna lotlhe ba lo lapileng, ba lo imelwang, me ke tla lo lapolosa."  
(Mathaio 11:28).

### MOETELEDI-PELE WA THULAGANYO:

Mo thulaganyong ya rona ya kabelo e re akanya kaga dilo tseo tse nako nngwe di le kang go koafatsa tumelo ya rona le go re kgaoganya le lorato lwa ga Keresete. Mo matshelong a rona go na le mathata a le mantsi, diteko le maswabi. Rona jaaka Bakeresete re tshwanetse go leka thata go nna Bakeresete ba ba nonofileng ka ntlha ya dilo tse. Ga re tshwanele go di letlelela go re kgaoganya le lorato lwa ga Keresete. Re ka dira se jang?

### KAROLO YA NTLHA: Tsotlhe Di Tswa Kwa Modimong

Fa monna gongwe rre a latlhegelwa ke tiro ya gagwe se se lere matshwenyego mo lolwapeng lotlhe. Mo metseng le mo ditoropong dijo di tshwanetse go tswa kae? Matlo a ka duelwa jang? Madi a sekolo? Le dilo tse dingwe tse dintsi? Modimo O a itse mme O tlhokomela dilo tse tsotlhe tse di re amang. A ka boammaaruri re ka baya mefuta e e ntseng jaana ya letlhoko mo Modimong mme ra ikanya mo go One?

Paulo o rile, "Jaanong one o o nonofileng segolo thata bogolo go dira tsotlhe tse re di lopang le tse re di gopolang." (Baefesia 3:20). O ne a lebisitse (raya) mo Modimong O O nonofo yotlhe le lorato. Bala mafoko a ga Jesu mo go Mathaio 7:7-11.

Jalo fa re dumela gore Modimo O a re rata mme O a re tlhokomela, re tla rapela re O kopa go tlhokomela letlhoko la rona. Mme ka gotlhe re O ikanye go go dira. Se ga se raye gore re nne fatshe mme re lete Modimo go baya dijo fa pele ga rona mo sejaneng di siametse go jewa. Nnyaa, re tshwanetse go dira se re ka kgonang go se dira go kगतlhantsha letlhoko la lolwapa lwa rona. Nna jaaka mosadi (yo o nyetsweng) le mme, ke ka kgona go bereka bontlangwe jwa nako go thusa letlhoko la lolwapa. Gongwe ba lolwapa ba ka kgona go boela go nna kwa masimong go fitlhelela monna a bona tiro e nngwe. Modimo O ka re goga mo dinakong tse di ntseng jaana. Re tshwanetrse go ikanya Modimo mme re O lete go re supetsa gore re dira eng.

### KAROLO YA BOBEDI: Thuto Mo Baneng Ba Rona E A Tlhokega

Botlhe batsadi ba Bakeresete ba rata go bona bana ba bone ba nna le thuto e ntsi kafa go tshwanetseng. Se se siame mme rona jaaka batsadi re direng gotlhe mo re ka go kgonang go ba thusa go nna le thuto. Mme tota se ga se selo se se tlhokegang thata thata ka metlha. Selo se se tlhokegang thata ke go ba ruta tsela ya ga Keresete. Ke boammaaruri re ka dira seo mme ra ba thusa go bona thuto.

Ga go kgonege mo baneng botlhe go fetsa lokwalo lwa bosupa, le matiriki le go ya kwa sekolong se se kwa godimo-dimo (yunibesiti). Bana ga ba botlhale botlhe go kgona go fetsa dithuto tse. Mme ga go na dikole tse di lekaneng mo go bone botlhe go dira se. Re lebogeleng kitso e ba e boneng le thuto e ba e amogetseng. Ba ka bala, ba ka kwala, mme ba ka dira dipalo.

Fa re ka thusa go ba bonela dikwalo (dibuka) ba ka tswela go ithuta go bala ga bone, go kwala le dipalo mme ba tswela go nna tlhaga. Mo masimong basimane ba ka ithuta kaga tiro ya tshimo (temo) mme basetsana ba tla kgatlhega mo go apeyeng le go roka. Selo se se tlhokegang ke go ba dirisa (berekisa) le go kgatlhegela go ithuta dilo tse dintsha. Kopa thuso le kaelo ya Modimo mo go se.

### **KAROLO YA BORARO: Bana Bangwe Ba A Fapoga [Timela]**

Lefa batsadi ba Bakeresete ba ruta bana ba bone kaga lorato le poloko ya ga Keresete bangwe ba gopola gore ba itse tsela e e botoka, e e leng tsela ya lefatshe. Mo polelong e Jesu O e boletseng, e re e itseng jaaka Morwa Sesenyi, rragwe ga a ise a ke a latlhegelwe ke tsholofelo ya gore morwawe ga a ketla a tlhola a boa. Lefa ngwana yo o godileng a ka timela (fapoga) re seka ra lesa go mo rata le go mo rapelela. Re tswela go rata ngwana lefa re sa itumelele gongwe go rata dilo tse o di dirang.

Jaaka batsadi re na le bana ba bannye a re lemogeng gore bone ba bannye ba, ba tla gola go nna bana le bagolo (tona). Re ka ba ruta jang go latela tsela ya ga Keresete? Simolola go ba ruta fa ba santse ba le bannye thata. Ba bolelele dipolelo tse di tswang mo Baebeleng. Ba balele Baebele. Ya kerekeng le sekolong sa Tshipi le bone. Ba baakanye fa ba le phoso. Ba dire gore ba itse gore o a ba rata. Ba otlhaye fa ba sa utlwe. Dira legae lefelo le le itumelang. Se sotlhe se tla thusa ngwana go gola a rata le go tlotla batsadi ba gawe jaaka o mo ratile mme o mo tlhokometse.

### **MOETELEDI-PELE WA THULAGANYO:**

Mo dithulaganyong tse nne tse tsa bofelo re buile kaga diteko tse dintsi tse di tlang mo go rona mo botshelong. A tse di ka re kgaoganya le lorato lwa ga Keresete? Ga di kake fa re tswela go baya tumelo ya rona mo go Keresete. Mo dipuisanyong tse re bone gore le eleng diteko tse di ka oketsa tumelo ya rona jang mme tsa re nonotshetsa segolo mo Moreneng. Ope wa rona ga a kake a laletsa gongwe go amogela epe ya diteko tse mo matshelong a rona. Lefa go ntse jalo fa di tla, a re goleng mo tumelong ka ntlha ya tsone. Ga go na gope fa Keresete O solofeditse gore botshelo jwa Sekeresete bo ka nna botshelo jo bo motlhofo. O solofeditse go nna le rona.

Moaposetoloi Paulo o rile, "Gonne kea tlhomamisa, go re, go le loso, go le botshelo, go le baengele, go le magosana, go le dilo tse di leeong, go le dilo tse di tla tlang, go le dinonofa, go le bogidimo, go le boteng, lefa e ka bo e le sebopiwa sengwe se sele, ga go ketla go nonofa sepe go re kgaoganya le lorato lwa Modimo, lo lo mo go Keresete Jesu Morena wa rona."

Fa re na le tumelo, jaaka Moaposetoloi Paulo, jalo rona, jaaka ene, re ka bua mafoko ao a a tshwanang mme re raya one, gore ga go sepe se se ka ra kgaoganyang le lorato lwa ga Keresete. A Morena a bakwe.

### **NAKO YA THAPELO**

## Thulaganyo 8

Tlhogo ya Kabelo: **DITSHOLOFETSO TSA MODIMO**

Tlhogo ya Gompieno: **DITSHOLOFETSO TSA BOTSHELO JO BO SA KHUTLHENG**

Temana ya Tlhogo:

"...O re neileng dipolelo tsa One tsa tsholofetso tse di tlokegang le tse dikgolo thata ka gone..." (2 Petere 1:4)

### **MOETELEDI-PELE WA THULAGANYO:**

Fa o dira tsholofetso, o ntsha lefoko la gago gore o tla dira sengwe. Modimo O naya lefoko la One gore O tla re direla dilo di le dintsi. Ditsholofetso tsa One di nnete ka metlha.

Re ka bala ditsholofetso tsa One mo Baebeleng. Mme go di bala fela ga go a lekana. Re tshwanetse go di dumlela le go di bolela mme re direng sengwe pele. Mme o bolelela ngwana wa gagwe gore, "Fa o siame, o tla bona sengwe se se faphegileng." Ngwana o amogela mpho fa a siame. Modimo O re solofetsa dilo dingwe fa re dumela. O dira ditsholofetso mo go rona tse di amang thapelo, mme pele re tshwanetse go rapela. Ditsholofetso tsa Modimo ke tsa bana ba One.

### **KAROLO YA NTLHA: Ka Gore 'ng Modimo O re Naya Ditsholofetso**

Modimo O re naya ditsholofetso tse dintsi gore re tle re tlhakanele mo dilong tse tsotlhe mo lolwapeng lwa Modimo. O tsaletswe mo lolwapeng. Jaaka tokololo ya lolwapa loo o tlhakantswe le dijo tsa ba lolwapa. O ntse le ntlo go robala mo go yone le diaparo go apara. O tlhakanetse masego le dikutlo-bolthoko tsa lolwapa. O tlhakanetse gape le tlhologo ya batsadi ba gago. Gongwe sefathlogo sa gago se tshwana le sa ga mmago, mme ditsela tsa gago di tshwana le tsa ga rrago. Lefa go ntse jalo ke gore, o tlhakane le maitseo a ba lolwapa leo.

Fa o nna Mokeresete, o tsaletswe mo lolwapeng lwa Modimo. Modimo O go batla go nna le seabe mo lolwapeng lwa One. O go batla go nna le masego a a teng mo baneng ba One. Gongwe o tla sotlega le wena jaaka Morwa One Jesu Keresete a sotlegile. Modimo O go batla go tlhakana le tlhologo ya One, go nna jaaka One. Ka dintlha tse O re neile ditsholofetso gore re tlhakanele tlhologo ya One mme re gole go nna jaaka One.

### **KAROLO YA BOBEDI: Motheo Wa Botshelo Jo Bo Sa Khutleng Ke Tumelo**

Gompieno re tla akanya ditsholofetso tsa One tse di amang botshelo jo bo sa khutleng. Bala Johane 3:16. Motho mongwe le mongwe yo o dumelang mo go Jesu Keresete o ka nna le botshelo jo bo sa khutleng. Se ke tsholofetso ya Modimo mme ke boammaaruri. O ntshitse Morwa One ka ntlha ya rona gonne O re ratile. O a re rata lefa re leofile mme re tshedile matshelo a a lereng tlotlologo mo leineng la One. Fa re dumela mo go One, re tla nna le botshelo jo bo sa khutleng. Tsholofetso e ke ya motho mongwe le mongwe yo o dumelang.

Bala Johane 3:36. Mo temaneng e, Jesu A re gore motho yo o dumelang mo go Ene "o na le botshelo jo bo sa khutleng." Botshelo jo bontsha bo simologa ka motsotso o o dumelang mo go Jesu Keresete ka one. Batho bangwe ba gopola gore, "botshelo jo bo sa khutleng" bo tla simologa fa matshelo a rona mo lefatsheng le a fela, mme se ga se se se buiwang ke Baebele. Ya re motho yo o dumelang o na le botshelo jo bo sa khutleng.

Bontlhanngwe jwa bofelo jwa temana e ke tsholofetso mo bathong ba ba sa dumeleng mo go Jesu. Ga ba ketla ba nna le botshelo jo ba sa khutleng, mme ba tla nna le bogale jwa Modimo.

### **KAROLO YA BORARO: Botshelo Jo Bo Itumedisang**

Jesu O buile le mosadi wa moleofi kwa sedibeng. O ne a tsile go ga metsi. Jesu O mmoleletse gore O ka mo siela metse a a tshelang. Fa motho a ne a nole metsi a sediba, o ne a ka nyorwa gape. Mme fa a nole metsi a Jesu O a sielang, o ne a se kake a nyorwa gape. O ne a ka itumela. Jesu, O ne a bua ka metsi a botshelo a eleng go Ene.

Bala Johane 4:14. Motho yo o nang le botshelo jo bo sa khutleng o na le botshelo jwa letlotlo. O itumetse. Ga a tlhoke go siamela kwa le kwa a batla boitumelo. Metsi a botshelo a timola lenyora la gagwe. O kgona go phuthologa le go itumela. Fa re nwa metsi a botshelo, Jesu O solofetsa gore, re tla itumela.

### **KAROLO YA BONE: Botshelo Jo Bo Bolokilweng Ke Modimo**

Bala Johane 10:28. Fa motho a dumetse mo go Jesu Keresete, O solofetsa go mmaya a tshela. A re ga go ope yo o ka mo utswang (phamolang) mo seatleng sa ga Rragwe. Bakeresete bangwe ba a tshaba fa ba dirile phoso. Ba gopola gore ba tla latlhegelwa ke botshelo jwa bone jo bo sa khutleng. Se ga se a tshwanela ka gonne Modimo O tla ba beela ruri.

Mokeresete o batla go dira tshiamo. O leka go dira sentle. Ga a itumele fa a leofa, gonne sebe se mo kgaoganya le Modimo. Mme fa a bolokilwe ka boammaaruri, ga a latlhe poloko ya gagwe. Se ke tsholofetso ya Modimo. Re ka tlhomamisa gore ke boammaaruri.

### **MOETELEDI-PELE WA THULAGANYO:**

Tse ke dingwe tsa ditsholofetso tsa Modimo kaga botshelo jo bo sa khutleng:

1. Motho yo o dumelang o tla nna le botshelo jo bo sa khutleng. Johane 3:16
2. Motho yo o dumelang o tla nna le botshelo jaanong. Johane 3:36
3. Motho yo o sa dumeleng ga a ketla a nna le botshelo. Johane 3:36
4. Botshelo jo Jesu O bo nayang bo a itumedisa. Johane 4:14
5. Modimo O tla beela modumedi ruri. Johane 10:28

A o dumetse mo go Jesu Keresete? Fa o sa dumela, a o tla dumela gompieno? Fa o dumetse, Mo lebogetse ditsholofetso tsa Gagwe tse di gakgamatsang.

### **NAKO YA THAPELO**

## Thulaganyo 9

Tlhogo ya Kabelo: Ditsholofetso tsa Modimo

Tlhogo ya Gompieno: Ditsholofetso Kaga Thapelo

Temana ya Tlhogo:

"...thapelo ya mosiami e na le nonofo e kgolo mo go direng ga yone." (Jakobe 5:16b)

### **MOETELEDI-PELE WA THULAGANYO:**

Gompieno re tla akanya kaga ditsholofetso mo thapelong. Go-rapela ke tsela ya rona ya go bua le Modimo. Go tswa tshimologong ya nako, batho ba tlisitse dikopo tsa bone kwa Modimong. Batho bangwe ba isa dikopo tsa bone kwa medimong gongwe ditshwanong tse dingwe. Medimo e ga e kake ya utlwa gongwe go araba dithapelo tsa bone. A Modimo O ka utlwa dithapelo tsa gago? A O tla araba?

Modimo O ka utlwa dithapelo tsa gago fa o rapela. Fa o seke o rapela, ditsholofetso kaga thapelo ga di kake tsa nna tsa gago. Jesu A re, "Kopang mme lo tla newa, batlang mme lo tla bona, konyakonyang mme lo tla bulelwa" (Mathaio 7:7). Fa ngwana wa gago a go kopa seno sa metsi, mo a siele. Fa a sa kope ga o mo a siele lefa metsi a le teng. Ke a gagwe fa a kopa. Modimo O a re rata. Re bana ba One mme O batla go re fa dilo tse di siameng. O ipaakanyeditse go utlwa fa re tla kopa.

### **KAROLO YA NTLHA: Nnang Mo Go Ene**

Mo go Johane 15:1-7 Jesu O itshwantsha le setlhare sa mofine. A re balatedi ba Gagwe ba tshwana le dikala tsa setlhare seo. Fa dikala di rengwa mo setlhareng, di a swaba. Ga di na botshelo kwa-ntle ga setlhare. Ga di kake tsa baya maungo. Ga di a siamela sepe. Bakeresete ba ba kgaogantsweng le Jesu Keresete ba ntse jalo. Fa ba kgaolwa mo go Ene, matshelo a bone ga se sepe. Fa ba supa, ba bua ka mafoko a a senang sepe. Mafoko a bone ga a na nonofo ka gore ba kgaotswe mo motsweding wa nonofo. Mme fa dikala di tshwaraganye le setlhare, nonofo e e tswang mo setlhareng e elelela kwa kaleng nngwe le nngwe. Kala nngwe le nngwe e tlhakanela mo nonofong ya setlhare. Kala nngwe le nngwe e ka ungwa.

Motho yo o nnang gaufi le Jesu o ntse jalo. O amogela nonofo ya gagwe mo go Jesu. O tlhakana le nonofo ya Gagwe (Jesu). O ka kopa se o se batlang mme se tla direga. O ka supa ka nonofo. O tla nna le maungo. Ka bo-ene, ga a sepe. Fa a tshwaraganye le setlhare, se e leng Jesu Keresete, o ka dira dilo tsotlhe. Thapelo e re tshwaraganya le Jesu Keresete.

### **KAROLO YA BOBEDI: Kopa Se O Se Eletsang**

Bala Johane 15:7. Modimo O solofetsa gore fa re nna mo go One le mafoko a One a nna mo go rona, O tla re fa sengwe le sengwe se re se kopang. Se se raya eng? A ruri re ka amogela sengwe le sengwe se re se kopang? Ee, fa re nna mo go One le mafoko a One mo go rona. Fa re nna mo go One, ga re ketla re kopa dilo tse eleng tsa tlotlo ya rona gongwe kgalaletso. Ga re ketla re kopa dilo tse di tla tlhokofatsang bosupi jwa rona jwa Sekeresete, lefa e le dilo tse di tla kgoreletsang batho ba Modimo.

Fa mafoko a One a nna mo go rona, re tla rapelela fela dilo tse di dumelanang le mafoko a One. Jalo Modimo O ipaakantse go re fa sengwe le sengwe se re se kopang. Mo

mafelong a mangwe mo Baebeleng re bolelelwa go rapela "mo leineng la One" mme re tla fiwa dilo tse re di rapelelang. Go raya gore re tshwanetse go rapelela fela dilo tse eleng thato (go-rata) ya Modimo.

### **KAROLO YA BORARO: Rapela O Dumela**

Bala Mathaio 21:18-22.

Moso mongwe Jesu le barutwa ba Gagwe ba ne ba tshwerwe ke tlala. Ba bona setlhare sa mofeige se na le matlhare fela lefa e ne e le nako ya maungo. Jesu O rile, "Go tloga letsatsi le setlhare ga se ketla se nna le loungo." Fa A buile, setlhare se ne sa swaba (sa swa). Barutwa ba ne ba gakgametse, mme Jesu A ba bolelela gore ba seka ba se gakgamalela. O rile se e ne e le selo se sennye fela, mme fa ba ne ba na le tumelo, ba ne ba ka sutisa le eleng dithaba. O rile, "Dilo tsotlhe tse lo tla di kopang ka thapelo, lo dumela, lo tla di amogela." (Mathaio 21:22). Modimo O solofeditse go dira dilo tse batho ba akanyang gore ga di a lebagana, fa re rapela ka tumelo.

### **KAROLO YA BONE; Boitshwarelo Le Boikokobetso**

Bala Mareko 11:25-26. Pele ga Modimo O ka utlwa dithapelo tsa rona, re tshwanetse go itshwarela ba bangwe. Fa re sa itshwarele ba bangwe, Modimo ga O kake wa re itshwarela. Kilo le kgang di kgoreletsa go tla ga rona kwa Modimong. Boitshwarelo bo tlosa dilo tse di kgoreletsang thapelo. Re tshwanetse gape go kopa Modimo go re itshwarela mo dibeng tsa rona. Dibe tsa rona di ka ema gape fa gare ga rona le Modimo. A re itshwareleng ba bangwe mo dilong tse di phoso tse ba di re diretseng. A re kopeng ba bangwe go re itshwarela fa re leofile kgatthanong le bone. A re kopeng Modimo go re itshwarela.

Bala Mathaio 6:6. Go ne go na le batho fa Jesu a le mo lefatsheng ba ba ne ba batla gore batho ba bangwe ba re ba siame lefa ba ne ba sa siama. Jalo ba ne ba ka ema fa lefelong le batho ba bantsi ba ne ba ka ba bona mme ba rapela ka lentswe le le kwa godimo. Jesu O rile batho ba ba dirileng se ba bone se ba se batlileng. Ba batlile gore batho ba ba bone mme ba ba galaletse. Jesu O boleletse barutwa ba Gagwe go se dire jalo.

Fa tota o batla go rapela Modimo, ga go re sepe gore a mongwe o a go bona gongwe nnyaa. O rile o ye kwa lefelong le le didimetseng kwa o ka rapelang ka sephiri. Jalo Modimo O tla utlwa mme O tla araba. Modimo gape O solofetsa go nna le setlhopha sa batho fa ba rapela lefa go ka nna ba se-kae ba bone. Bala Mathaio 18:20.

### **MOETELEDI-PELE WA THULAGANYO:**

Nako nngwe mosadi o batla go rapela Modimo, mme ga a itse gore o ka re'ng. Pelo ya gagwe e bokete mo o se kakeng a bona mafoko a go tlhalosetsa Modimo letlhoko la gagwe. Modimo O re solofetsa thuso ya Mowa O O Boitshepho fa re sa itse go rapela. Bala Baroma 8:26-27.

Ditemana tsa go gakologelwa kaga thapelo:

1. O tshwanetse go kopa. Mathaio 7:7
2. Nna mo go One (Modimo). Johane 15:7
3. Rapela o dumela. Mathaio 21:22
4. Itshwarele mme o batle boitshwarelo. Mareko 11:25-26
5. Rapela mo sephiring. Mathaio 6:6
6. Rapela le ba bangwe. Mathaio 18:20
7. Mowa O O Boitshepho O tla thusa. Baroma 8:26-27

### **NAKO YA THAPELO**

## Thulaganyo 10

Tlhogo ya Kabelo: DITSHOLOFETSO TSA MODIMO

Tlhogo ya Gompieno: DITSHOLOFETSO TSE DI AMANG KUTLO-BOTLHOKO LE THAELO

Temana ya Tlhogo:

"Lo nntse lo latlhela tlhobaelo yotlhe ya lona mo go One, ka oa lo babalela."  
(1Petere 5:7).

### MOETELEDI-PELE WA THULAGANYO:

Bakeresete ba le bantsi ba bona go le thata fa ba na le merwalo (mathata) e e bokete go e belega. Go thata bogolo fa ba na le bakaulengwe ba ba tswelelang (mo botshelong) mo go sengwe le sengwe se ba se dirang ba eseng Bakeresete. Le eleng Dafide o ne a na le bothata jo. A re, "Ke ne ka nna pelotshetlha kaga baikgodisi, fa ke bona letlhogonolo ba baikepi." (Dipesalema 73:3). Modimo O naya bana ba One ditsholofetso tse dintsi kaga kutlo-botlhoko le matshwenyego a ba nang le one fa, mo lefatsheng. A re lebeng mangwe a mathata a gompieno.

### KAROLO YA NTLHA: Modimo O Tlhokomela Letlhoko La Rona

Bala Mathaio 6:33. A o kile wa tshwenyega kaga dijo tsa ba lolwapa lwa gago? A o kile wa tshwenyega ka gore o sena diaparo tse di siameng go apara? Jesu O re ruta gore Modimo O tlhokomela letlhoko la rona lotlhe. Rara wa legodimo O otlala dinonyane. A ga o di fete ka tlhotlha (seemo)? Mme ke ka gore'ng o tshwenyega kaga diaparo? Modimo O dira dithunya mme di dintle bogolo go diaparo tsa dikgosi.

Jesu O rile go batliwe dilo tsa se-mowa pele mme Modimo O tla disa (tlhokomela) letlhoko la rona. Ga a reye gore re nne ditshwakga mme re lebelele Modimo go re fa dijo le diaparo mme re sa bereke. O batla re nna le tumelo mo go One mme re sa senye nako ya rona yotlhe re tshwenyega kaga madi le dilo (tse dingwe). Batho ba le bantsi ga ba ke ba itumela. Ba senya nako ya bone yotlhe le nonofo ba tshwenyega kaga go bona dijo le diaparo tsa ka-moso. A re lebogeleng Modimo dilo tse re nang natso letsatsi le letsatsi. A re direng (berekeng) thata; jalo re ikanyeng Modimo mo dilong tsa ka-moso.

### KAROLO YA BOBEDI: Modimo O Belega Merwalo Ya Rona Mme O A Re Gomotsa

Bala Mathaio 11:28-30. Bakeresete bangwe ba na le merwalo e e bokete thata go e belega. Mosadi yo o swetsweng ke monna o na le tshwanelo ya go godisa bana ba gagwe. Basadi bangwe ba na le banna ba ba itayang (betsang). Basadi bangwe ba tshwanetse go dira (bereka) thata lefa botsogo jwa bone bo sa siama. Batho bangwe ba tshaba go swa. E ke merwalo e e bokete go e belega. Jesu O biletsa mongwe le mongwe yo o rweleng morwalo o o bokete kwa go Ene. O solofetsa go mo naya boitapoloso. A re a belege (tseye) jokwe wa Gagwe. E motlhofo le bofefo go belegwa.

Bala Johane 14:16. Jesu O solofeditse gore ga a kake a tlogela balatedi ba gagwe ba le losi. Ba ne ba utlwile-botlhoko mme ba tshaba. O ba boletse gore One a ya kwa go

Rara, mme Mogomotsi O tla tla mo boemong jwa Gagwe go nna le bone. Ke Mowa O O Boitshepho. O santse O le teng go re thusa fa re tshwenyegile le go re gakolola ka dithuto tsa ga Jesu. Ga o ke o nna nosi mo matshwenyegong a gago. Jesu O solofeditse go nna le wena mme ditsholofetso tsa Gagwe di nnete.

#### **KAROLO YA BORARO: Modimo O Tla Lere Boitumelo Mo Tshotlegong**

Bala Mathaio 5:11-12. Fa Mokeresete a sotlega ka ntlha ya tumelo ya gagwe mo go Jesu Keresete, o ka itumela ka gore o itse gore Jesu ka Bo-ene O ne a bogisiwa. Lefa botshelo jwa gagwe mo lefatsheng bo ka nna thata, Mokeresete o solofediwa tuelo kwa legodimong. Fa motho a sotlega ka gore a fositse, o lebaganwe ke kotlhao e o e amogelang. Ga a na ntlha ya go itumela mo tshotlegong ya gagwe.

Bakeresete ba sotlegela tumelo ya bone ka ditsela tse dintsi. Bangwe ba a itewa mme ba golegwe. Bangwe ba lelekwa mo go ba malwapa a bone. Mme Bakeresete ba le bantsi ga ba sotlege ka ditsela tse. Ba tshwanetse go ema ba tlhomame mo tumelong ya bone lefa ba bangwe ba ba tshega gongwe ba ba nyatsa. Ba nne ba le boammaaruri mo go Jesu Keresete lefa ba malwapa a bone le ditsala ba latela tsela ya botagwa le boloi. Ba ka nyadiwa le go kgalemelelwa go gana go tsaya karolo mo go dingwe tsa ditiro tse. Mokeresete o sotlega ka ditsela tse, le ene, mme tsholofetso ya Modimo ke gore mo go ba ba sotlegang ba ipele mo pogisong ya bone ka ntlha ya tshiamo.

#### **KAROLO YA BONE: Modimo O Tla Go Thusa Mo Thaelong**

Bala 1 Bakorintha 10:13. Dithaelo tse re nang le tsone ke mofuta o gale o tlang kwa bathong. Ga re ketla re nna le dithaelo tse di kgolo thata mo go rona go di itshokela. Se ke tsholofetso ya Modimo. Ga O ketla O re lesa go raelwa go feta nonofo ya rona. O tla re naya nonofo go e e itshokela. Modimo O tla re supetsa tsela ya go falola thaelo e e fa pele ga rona.

Motho yo o ikanyang Modimo ka nnete ga a ketla a re, "Ke kabo ke sa se dira, mme thaelo e ne e le kgolo thata." Modimo ga O ketla O re lesa go lekwa go feta nonofo ya rona ya go ema. Fa re ineela mo tekong, ke ka gore re tlaela tumelo.

#### **KAROLO YA BOTLHANO: Modimo O Tla Itshwarela**

Bala 2 Samuele 11:14-15 le 26-27. Dafide o ne a dira sebe se se golo. O dirisitse thata ya gagwe jaaka kgosi go romela monna kwa ntweng go bolawa ka gore o batlile mosadi wa gagwe. O ne a le molato wa keletso le polao. O dirile maipato mo pelong ya gagwe ka dibe tse o di dirileng. O ne a iphetsa jaaka kgosi gore o ka tsaya sengwe le sengwe se o ne a se batla.

Lefa go ntse jalo Dafide o ratile Morena. Fa Nathane moperofeti a supeditse Dafide boleo jwa gagwe, o bone ka bonako gore o ne a le phoso jang. O ne a lesa go dira maipato kaga diphoso tsa gagwe. O retologetse kwa Modimong mme a ipolela sebe sa gagwe, a kopa boitshwarelo. Modimo O mo itshwaretse mme Dafide a tswelela go direla Modimo. O ka bala mo go Dipesalema 51:1-4 ka thapelo ya ga Dafide ya boikwatlhao.

Gantsi go thata mo Bakereseteng go bona phoso e ba e dirang. Mme ka dinako dingwe fa re bona dibe tsa rona re santse re sa rate go di ipolela. Bakeresete bangwe ba ba leofileng ba tlhomola-pelo ka ntlha ya go dira phoso ga bone mo ba leakang go iphitlhela Modimo. Ka ntlha ya sebe sa bone ba emisa go ya kerekeng gongwe go kopana le Bakeresete ba bangwe. Ga ba ipolele dibe tsa bone jaaka a dirile.

#### **MOETELEDI-PELE WA THULAGANYO:**

Re na le tsholofetso gore Modimo O tla itshwarela fa re ipolela dibe tsa rona. "Fa re ipolela dibe tsa rona O boikanyo le tshiamo, mme O tla itshwarela dibe tsa rona, le go re itshekisa mo tshiamololong yotlhe." (1 Johane 1:9). O solofetsa gore, "...Fa motho mongwe a leofa re na le Mueledi kwa go Rara, ebong mosiami Jesu Keresete." (1 Johane 2:1).

Ga re tlhoke go tshwenyega. Modimo O solofetsa go tlhokomela letlhoko la rona. O tla belega merwalo ya rona. Modimo O tla re fa Mogomotsi, Mowa O O Boitshepho, go re thusa mo nakong ya bothata. O tla re fa boipelo fa re sotlega ka ntlha ya One. Ga O ketla O re lesa go raelwa go feta nonofo ya rona. Fa re leofa, O ta re itshwarela. A re ikanyeng mo go One gotlhe-gotlhe.

#### **NAKO YA THAPELO**

## Thulaganyo 11

Tlhogo ya Kabelo: DITSHOLOFETSO TSA MODIMO

Tlhogo ya Gompieno: DITSHOLOFETSO TSE DI AMANG BOTLHALE LE NONOFO

Temana ya Tlhogo:

"Ke ka dira dilo tsotlhe ka ene yo o nnonotshang." (Bafilipi 4:13).

### **MOETELEDI-PELE WA THULAGANYO:**

Bakeresete bangwe ba ikutlwa gore ga ba kake ba dira dilo tse Modimo O batlang balatedi ba One ba di dira. Bangwe ba re, "Ga ke a rutega. Ga ke itse gore ke dire jang." Ba bangwe ba re, "Ga ke na nonofo ya go se dira." Mme ba bangwe ba re, "Ga ke kake. Ke tlhomamisa go palelwa." Modimo O re fa ditsholofetso dingwe mo botshelong jwa rona jwa Sekeresete le mo go supeng. A re lebung ditsholofetso tsa One kaga botlhale le nonofo.

### **KAROLO YA NTLHA: Modimo O Tla Naya Botshelo**

Bala Jakobe 1:5. Modimo O re solofetsa go re fa botlhale fa re bo kopa. Botlhale jwa One bo tla re thusa go tlhopha tsela e e siameng go e latela. Gantsi go thata go itse tsela e e siameng thata. Nako nngwe ditsela di le pedi di lebega di siame. O re solofetsa go tlhopha tsela e le nngwe-fela e e leng tsela ya One.

Botlhale jwa One bo tla thusa bo-mme fa ba ruta le go gakolola bana ba bone. Fa ngwana a botsa mmagwe se o tshwanetseng go se dira, mmagwe a kope Modimo botlhale pele ga a ntsha karabo. Botlhale jwa One bo tla re thusa go tlhaloganya mathata a ba bangwe gore re ka ba thusa. Mme re tshwanetse go kopa botlhale jwa One go se jalo ga bo ketla bo nna teng mo go rona.

### **KAROLO YA BOBEDI: Mowa O O Boitshepho O Tla Go Ruta**

Bala Johane 14:26. Jesu O re solofetsa gore Mowa O O Boitshepho O tla re ruta le go re thusa go gakologelwa gotlhe mo Jesu O go buileng. Fa re batla go ithuta, re tshwanetse go bala Baebele. Mowa wa Gagwe O tla re ruta thanolo ya dintlha tse re sa di tlhaloganyeng. O tla re thusa go tlhaloganya fa re se kake ra bala sentle. O tla thusa motho yo go tlhaloganya fa Lefoko la Modimo le balwa ke motho yo mongwe. O tla thusa go gakologelwa dithuto.

Go na le Bakeresete ba le bantsi ba ba nang le thuto e nnye thata, mme ba itse dithuto tsa Bebele. Mowa wa Modimo O ba thusitse go tlhaloganya. Re tshwanetse go ithuta le go nna le tumelo gore O tla re thusa. Se ke tsholofetso ya One, mme ditsholofetso tsa One di nnete.

### **KAROLO YA BORARO: Modimo O Tla Go Fa Nonofa**

Bala Isia 40:31. Modimo O solofetsa bana ba One gore ba tla nna le nonofa mo ditirong tsa bone (tse di bokete). Tsholofetso e ke ya bao "ba letang mo Moreneng." Ke bo mang batho ba ba "letang mo Moreneng?" Ke ba ka metlha yotlhe ba latelang bogogi jwa Gagwe. Ga ba simolole tiro epe mo matshelong a bone kwa-ntle ga go batla go-rata ga Gagwe pele. Ga ba dire maano (dipaakanyo) ape mo matshelong a bone fa ese ba rapela Modimo go ba supetsa go-rata ga One. Jalo, sengwe le sengwe se ba se dirang se mo thulaganyong ya One. O tla fa batho ba nonofa mo ditirong tsa bone. Ba tla kgona go dira sengwe le sengwe ba sa lape.

### **KAROLO YA BONE: Nonofa Ya One E Fenya Bokoa Jwa Rona**

Bala 2 Bakorintha 12:9. Paulo on ne a tshwenngwa ke bokoa bongwe jo o ne a na le jone mo mmeleng wa gagwe. Ga a bo bolele ka leina; o bo bitsa "mutlwa mo nameng." O rapetse Modimo gore O o ntshe, mme Modimo ga Wa ka Wa dira jalo. Jalo Paulo o lemogile gore bokoa jwa mmele wa gagwe bo mo pateleditse go ikanya mo Modimong. Boemong jwa bokoa jwa gagwe o ne a na le nonofa ya Modimo.

Tshegofatso ya Modimo e re lekanye rotlhe. Fa re le bokoa, re ikanye mo Modimong. Fa re O ikanya thata, re tla nna le nonofa thata. Re ka ananya makoa a rona ka nonofa ya One. Batho ba bantsi ba ba thata mo mebeleng ya bone le botlhale, ga ba ikanye mo Modimong. Ba gopola gore ba na le nonofa go dira sengwe le sengwe ka bo-bone. Fa ba ikanya fela mme ba seke ba leba kwa Modimong ba tlhomamisa go palelwa. A re ikanyeng Modimo gotlhe-gotlhe mme re anyeng makoa a rona ka nonofa ya One.

### **MOETELEDI-PELE WA THULAGANYO:**

Bala Mathaio 28:19-20. Jesu O laotse balatedi ba Gagwe go ya gotlhe go dira barutwa. Taolo e ke ya badumedi botlhe. Fa re e utlwa, gongwe re gopola gore, "Ke ka dira se jang? Ke mosadinyana fela." Mme Jesu O dira tsholofetso. O solofetsa gore O tla nna le rona ka metlha yotlhe. Jalo fa re ruta gongwe re supa, re ka tlhomamisa gore O teng. Bala Mathaio 28:18. Jesu O na le nonofa yotlhe le taolo. Fa a na le rona, ga go se se ka re fenyang. Re ka bua jaaka Paulo a buile, "Ke ka dira dilo tsotlhe ka Keresete yo o nnonotshang."

Modimo O re solofetsa botlhale. O re solofetsa Mowa O O Boitshepho go re ruta. O re solofetsa go re fa nonofa. O re solofetsa maungo mme Wa re O tla nna le rona ka metlha yotlhe. A re ineeleng mo tirong ya One, re itse gore O tla re tlhokomela mo letlhokong la rona lotlhe.

### **NAKO YA THAPELO**

## Thulaganyo 12

Tlhogo ya Kabelo: HONG KONG

Tlhogo ya Gompiano: GO-RERA MAFOKO A A MOLEMO MO HONG KONG

Temana ya Tlhogo:

"Go sego morafe o Jehofa eleng Morena wa one, batho ba O ba itshenketseng gore e nne boswa jwa gagwe ka esi." (Dipesalema 33:12).

### MOETELEDI-PELE WA THULAGANYO:

Ka dingwaga di le dintsi baruti ba diretse Modimo mo lefatsheng la China. Mo ngwageng wa 1949 Bagateledi (Communists) ba tsaya puso ya China. Baruti ba Sekeresete le Bakeresete ba boikanyego ba le bantsi ba ne ba patelediwa go tlogela China. Bontsi bo ne jwa ya kwa lefelong-le-le-gaumi le le bidiwang Hong Kong. Mo dibekeng tse pedi tse di tlang re tla ithuta kaga Hong Kong. Dikete tsa batho di nna mo Hong Kong. Bala Ditiro 10:34-35 .

### KAROLO YA NTLHA

Hong Kong ke setlhake se se gaumi thata le lefatshe la China. China ke lefatshe le le tona thata, mme Hong Kong o monnye thata. O monnye thata mo go Botswana. Batho ba ba nnang teng ba feta 4,000,000 (4 million). Batho botlhe ba ba nnang teng ba ka nna Ma-China. Go feta batho ba le 1,000,000 (1 million) ba batho ba ba folotse mo Kgatelelong ya China. Go na le ditemo-thuo di sekae ka gore lefatshe le lentsi ke dithaba tse di fologelang (boteng) le maje a a kwa godimo. Lefa go ntse jalo, lefatshe lotlhe le le sephaphathi le le teng le dirisediwa temo-thuo. Batho ba rua dikoko le dikolobe.

Hong Kong ke lefelo la dikepe le le tona kwa dikepe di tlang gone. Go na le dithekisanyo di le dintsi le mafatshe a mangwe. Batho ba le bantsi ke batshwara-ditlhapi. Batho ba ja tlhapi thata. Hong Kong o tletse batho ba thata. Ba na le nako e e thata thata go bona mafelo a go nna a a lekaneng.

Batho bangwe ba ba ne ba tswa kwa China e ne e le Bakeresete. Bontsi-ntsi jo bongwe ga bo itse Jesu. Bontsi bo obamela mewa ya bagolo ba bone. Bontsi bo obamela setshwantsho se se bidiwang Buddha. Bangwe ba setse tumelo ya ga Mohammed morago mme ke ba moselemo.

Re tlhoka go rapelela batho ba bantsi ba ba ba nnang kwa Hong Kong.

### KAROLO YA BOBEDI

Baruti ba ntlha ba Baptist ba ile kwa Hong Kong dingwaga tse di 130 tse di fetileng. Go dira tiro mo Hong Kong go ne go le thata thata. Batho ba le bantsi ba tshegile ka molaetsa wa Lefoko la Modimo. Ba se-kae ba dumetse. Morago ga 1949 Bakeresete ba ba duleng kwa China ba tsene dikereke tsa Baptist mo Hong Kong. Dikereke di ne tsa simolola go gola thata. Gompiano go na le dikereke di le 34 tsa Baptist mo Hong Kong.

Go na le dintlha tsa thero di le 30. Go ka ne go na le Mabaptist a le 21,000. Baruti ba Baptist ba masome a marataro le bosupa ba dira koo go rera Lefoko la Modimo.

Go na le dikereke tsa babui-Sekgoa di le pedi. Tse dingwe ke dikereke tsa babui-Se-China. Ba na le baruti ba Ma-China

Dikereke di tshwana le tsa rona thata. Di na le sekolo sa Tshipi, thuto ya Baebele, kopano ya thapelo, le Basadi ba Baptist. Gape, di na le ditlase tsa kolobetso tsa badumedi ba basha.

## **KAROLO YA BORARO**

Mabaptist mo Hong Kong a dira tiro e nngwe gore a rere Lefoko la Modimo. Go na le dikole tsa Baptist di le nne tse dipotlana le tse dikgolo mo Hong Kong. Tse di tsenwa ke baithuti ba le bantsi ba eseng Bakeresete. Baithuti botlhe ba ithuta Baebele. Ba utlwa Lefoko la Modimo jaaka ba ithuta mo dikoleng tsa Baptist. Ngwaga le ngwaga bontsi bo nna Bakeresete.

Gape go na le sekolo se se kwa godimo-dimo sa Baptist mo Hong Kong. Baithuti ba feta dithaosanta di le pedi (2,000) ba tsena sekolo se. Batho ba basha ba le bantsi ba gompiano ba tlogetse tumelo ya batsadi ba bone le ya bo rra-bo-mogolo. Ba batla botshelo jo boshsha. Mabaptist a leka go thusa makawana le barweetsana ba go bona botshelo jo boshsha mo go Keresete.

Ka 1951 Kopano ya Thuto ya Boruti e ne ya rulaganngwa. Gompiano go na le baithuti ba le 48 ba ba amogetsweng mo kopanong. Bontsi jwa ba ba ipaakanyetsa go dira jaaka baruti gongwe basadi ba baruti. Lefa ba ithuta kwa sekoleng, ba dira mo dikerekeng. Ba rera le go ruta Lefoko la Modimo.

A re rapeleleng baithuti le baruti (matitshara) mo dikoleng tsa Baptist mo Hong Kong.

## **KAROLO YA BONE**

Mabaptist gape a na le kokelo mo Hong Kong. E simolotse e le kokelwana e nnye thata. Gompiano ke kokelo e kgolo e balwetsi ba le ba ntsi ba tlang kwa go yone. Lefoko la Modimo le reriwa malatsi otlhe mo ditirelong mo thung ya thuto. Moruti wa Morapedi o supela balwetsi. Dingaka tse Sekeresete le baoki ba direla mo leineng la ga Jesu. Batho ba le bantsi ba amogela Jesu fa ba le mo kokelong.

Go na le Ntlo ya Kanamiso (Phatlalatso) ya Dikwalo mo Hong Kong mo dikwalo tsa dikereke di anamisiwang ka Se-China. Dikwalo tsa tshupo, dikwalo tsa boineelo, dikwalo tsa Basadi ba Baptist, dikwalo tsa dipina, Dibaebele, le dikwalo tsa go bala mo sekoleng (sa-boruti) le tsone di dirwa teng. Dikwalo tse di tswang mo ntlong e ya kanamiso di ya le lefatshe lotlhe. Di romelwa kwa mafatsheng a a fetang 26 kwa batho ba China ba eleng teng.

Mabaptist a na le lebentlele la dikwalo. Ba na le bothibebele kwa banna, basadi, basimane le basetsana ba nnang le dikopano.

Re ka bona gore mo Hong Kong Mabaptist a dira tiro e e tshwanang ya go rera Lefoko la ga Jesu Keresete jaaka re dira. Ba tlhoka dithapelo tsa rona. Go na le batho ba le bantsi-ntsi ba ba senang Keresete. Batho ba tlhoka go itse gore Jesu O a ba rata.

Mabaptist a Hong Kong gape a amega kaga dikete tsa batho ba ba mo China wa Kgatelelo. Bontsi bo na le masika koo. Mo China batho ga ba letlelelwe go obamela Modimo. Mabaptist a a mo Hong Kong a tswelela go rapela gore letsatsi lengwe ka bonako dikgoro di tlabo di bulegile mo China. A rapela gore Lefoko le ka rerwa gape, ka phuthologo mo China.

## MOETELEDI-PELE WA THULAGANYO


A re rapeleleng Bakeresete bao ba ba sotlegang segolo mo China wa Kgatelelo, le mo mafatsheng a mangwe otlhe a kgatelelo.

A re rapeleleng Mabaptist a a mo Hong Kong a a le kang go supela Jesu.

A re le bogeleng Modimo kgololesego e re nang le yone ya go rera Lefoko mo lefatshing la rona.

A re rapeleng gore letsatsi lengwe Lefoko la ga Jesu Keresete le ka rerwa ka phuthologo mo lefatshing lotlhe mo bathong botlhe.

## NAKO YA THAPELO



Thulaganyo 13

Tlhogo ya Kabelo: HONG KONG

Tlhogo ya Gompiano: GO-DIRELA MODIMO MO HONG KONG

Temana ya Tlhogo:

"Me botlhe ba ba mo tshotseng, a ba naya tshiamelo ya ga nna bana ba Modimo, ebong bone ba ba dumetseng mo leineng la Gagwe." (Johane 1:12).

#### **MOETELEDI-PELE WA THULAGANYO:**

Bala Baroma 10:9-15. Baebele e re bolelela gore lefa e le mang yo o tla bitsang leina la Morena o tla bolokwa. Mme batho ga ba kake ba bitsa mo Modimong go fitlhela mongwe a ba bolelela kaga One. Gompiano re tla ithuta gape kaga Mabaptist a a mo Hong Kong a a bolelelang ba bangwe kaga Modimo. Re tla ithuta kaga bangwe ba ba utlwileng Lefoko la Modimo mme ba dumetse mo go One.

#### **KAROLO YA NTLHA**

Ngwaga e e fetileng nngwe ya dikereke tsa Baptist mo Hong Kong e tshegeditse tirelo ya kolobetso. Mongwe wa ba ba ne kolobediwa e ne e le mme-mogolo wa Mo-China yo o godileng thata. O ne a godile thata le bokoa go fologela dikgato tse di yang mo ledibeleng (letsha) la kolobetso ka bo ga-gagwe. O ne a belegwe ke morwadi. O ne a kolobediwa ke moruti. Bakeresete ba galaleleditse Modimo gore mosadi-mogolo yo o tsofetseng (godileng) o bone botshelo jo bosha mo go Keresete.

Mo botshelong jwa gagwe johlhe mosadi-mogolo yo o obametse mewa ya bagolo ya gagwe. Gape o obametse setshwantsho, Buddha. O ne a lwala mme a isiwa kwa kokelong ya Baptist. Koo a utlwa Lefoko la Modimo mo Moruting wa Thapelo wa Kokelo. Gape dingaka tsa Sekeresete le baaki ba mo supela kaga Jesu. O ne a reetsa mme Modimo Wa bua le pelo ya gagwe. O rile o tla amogela Keresete.

Pele ga a tlogela kokelo, mosadi-mogolo o ne a bolelelwa kaga kereke e nnye e e gaufi le legae la gagwe. O ile kerekeng. Ka bonako o dirile thuto ya phatlalatsa ya tumelo ya gagwe mo go Keresete. O tsene ditelase (dithuto) tsa kolobetso. O ne a ikemeseditse (ikaeletse) go kolobediwa, lefa a na a tsofetse thata mme a se kake a tsamaya sentle. Jalo ba mo tseela mo metsing. O ne a latela Mmoloki wa gagwe mo kolobetsong.

Modimo O amogela botlhe ba ba tlang kwa go One, ba bannye gongwe ba bagolo. A re galaleletseng Modimo kokelo ya Sekeresete e e mo Hong Kong. Re O lebogele gore batho ba ba latlhegileng (timetseng) ba ka utlwa Lefoko la Modimo mme ba nna bana ba Modimo.

## **KAROLO YA BOBEDI**

Ba-lolwapa lwa ga Wong ba falotse mo China wa Kgatelelo. Ba na ba se kake ba tsaya sepe sa bone. Ba gorogile mo Hong Kong fela ka diaparo tse ba ne ba di apere. Ba ne ba isiwa lefelong lengwe go nna teng. Makgolo a batho ba ba ne ba tshwana le bone ba ne ba nna teng mo matlong a mantsi a a pitlaganyeng.

Ba-lolwapa lwa ga Wong ba ne ba le sego. Ba ne ba le Bakeresete. Ka bonako ba batla kereke fa ba ka obamang gone. Bakeresete ba ba amogela ka boitumelo. Bakeresete ba simolola go thusa ba-rra rre Wong. Moruti a thusa go batlela Rre Wong tiro. Bakeresete ba bangwe ba thusa Mma-Wong go batla tiro ya mothusi (mo ntlong). Lefa ba ne ba duelwa madi a mannye thata, ba berekile thata. Ka bonako ba ne ba kgona go bona ntlo e e botoka go nna. Ka bonako bana ba kgona go ya sekoleng.

Lolwapa lotlhe lwa nna bagogi ba siameng mo kerekeng. Ba batlile go thusa ba bangwe jaaka ba thusitswe. Ba batlile ba bangwe ba ba falotseng mo Bagateleding. Ba batlile ba ba ne ba hutsafetse mme ba le bodutu (ba tlhontse). Ba ntse ditsala tsa nnete mo go ba ba ne ba sena ditsala. Ba tswelela go direla Modimo le go supa lorato lwa One mo go ba bangwe malatsi otlhe.

## **KAROLO YA BORARO**

Mosadi wa Mabaptist le morwadie yo mmotlana ba ne ba kgona go tswa mo China wa Kgatelelo go ya Hong Kong. Ba bangwe ba lolwapa ba ne ba sala mo China. Mosadi e ne e le Mokeresete wa boikanyo. O rapeletse ba lolwapa lwa gagwe ba ba kwa China thata.

Moso mongwe wa Tshipi o gorogile kwa kerekeng le morwawe yo mmotlana. Mosimane yo o dingwaga di le 16 le tsala ya gagwe ba tloletse mo metsing. Ba shapile tsela yotlhe go ya Hong Kong go tswa China. Mosadi o ne a itumetse thata. O lebogetse Modimo phalolo ya ga morwawe.

Morago ga dibeke tse pedi morwadie yo motona le morwawe yo mongwe ba shapile go kgabaganya metsi. Ba tsene mo kgololesegong mo Hong Kong. Ka bonako bana ba bararo botlhe ba ne ba amogela Keresete. Ba ithutile mo ditlilaseng jaaka Bakeresete ba basha. Botshe ba bararo ba kolobeditswe.

Ke rre (monna) fela le morwa yo motona ba ba setseng kwa China. A re rapeleng gore dikete tsothle mo China letsatsi lengwe di tla kgona go utlwa Lefoko la Modimo.

## **KAROLO YA BONE**

Mabaptist a a mo Hong Kong a batla go bolelela batho ba bantsi ba lefatshe la bone kaga Keresete. Go na le tumelo ya bogologolo le poifo. Go na le batho ba le ntsi-ntsi ba ba humanegileng ba ba seng dijo tse di lekaneng go ja. Bontsi ga bo na diaparo go apara. Batho ba basha ba le bantsi ba tlogelela batsadi ba bone tumelo. Letlhoko le le tona-tona la batho ba botlhe ke go itse Jesu.

Mabaptist ga a amege fela kaga batho ba ba mo Hong Kong, lefatshe la bone. Ka 1972, Mabaptist a a mo Hong Kong a romile baruti ba bararo. Ba ile go dira le batho ba Ma-China ba ba mo mafatsheng a Malaysia, Singapore le Vietnam Borwa.

## **KAROLO YA BOTLHANO**

Rre le Mme James Fung ba ile Vietnam go dira le batho ba Ma-China teng. Ke baruti ba ba tlhokomelwang ke Mabaptist a Hong Kong.

Rre le Mme Fung ba ile Sekoleng sa Baptist sa Boruti mo Hong Kong. Rre Fung o tsaletswe kwa China. Ba dumetse gore Modimo O ba bileditse mo tirong ya One. Ba ile Sekolong sa Baptist sa Boruti go ithuta. Fa ba le koo, ba kopane le moruti a tswa Vietnam. Moruti yo a ba bolelela kaga batho ba Ma-China ba ba nnang mo Vietnam.

Modimo O buile le Rre le Mme Fung kaga Ma-China a a latlhegileng (timetseng) a, ba ba mo lefatsheng la Vietnam. Ba ra-Fung ba itsile gore Modimo O ba biletsa go ya jaaka baruti kwa bathong ba. Ba boleletse batho ba Ma-China ba Vietnam kaga lorato lwa Modimo mo go bone. Lefa go ntse jalo, ka gore Bagateledi ba ne ba gapa Vietnam, ba ne ba tshwanela go tsamaya. Bagateledi ga ba batle Lefoko la ga Jesu go rerwa.

## **MOETELEDI-PELE WA THULAGANYO:**


Re lebogela Modimo Bakeresete ba ba mo Hong Kong. Re O lebogela gore ba direla Morena ka tsela e e itumedisang. A re ba rapeleleng.

A re rapeleleng gape baruti ba Ma-China ba ba ileng kwa mafatsheng a mangwe.

A re rapeleng gore re ka dira go bolelela ba bangwe kaga Mmoloki, Jesu Keresete.

A re rapeleleng gore letsatsi lengwe Modimo O tla bitsa Bakeresete ba Botswana go O direla jaaka baruti. Rapelang gore batho ba rona ba tla ya kwa mafatsheng a mangwe kwa batho ba tlhokang Lefoko la Modimo. A re rapeleng gore re ka nna batlhanka ba boammaaruri ba Modimo fa re nnang teng.

## **NAKO YA THAPELO**



## TEMANA YA TLHOGO YA BASADI BA MABAPTIST

"Gonne re badiri mmogo le Modimo: lona lo temo ya Modimo, lo kago ya Modimo."

1 Bakorintha 3:9

## SEFELA SA BASADI BA MABAPTIST

### Tlang Basadi Bolelang

1.  
Tlang basadi bolelang.  
Botshelo Moreneng  
Binang botlhe  
Keresete Wa phatsima  
Kreste Yo 'tsogileng  
Krest' O rwesang sedi  
Obamelang.
2.  
Tlisang bana botlhe  
Le banyana botlhe  
Lo baruteng,  
Batho ba lapileng  
Le balwetsi botlhe  
Ba ba mo lefifing  
Rapelelang.
3.  
Lo direng ka...thata  
Opelang bosele.  
Tshelang rato,  
Naledi tse kganyang  
Mopelong tsa lona,  
Tsoswang ka lorato,  
Solofelong.
4.  
Fa tshimo ya poloko.  
'Tla' 'ngwelwa Morena  
Mo motsweding,  
Wa Keresete Mmoloki  
Yo O galalelang  
O nayang botshelo,  
Bosakhutleng!